

ধাতুরূপ : ‘কর’ ধাতু

● বর্তমান কাল

প্রকার	উত্তমপুরুষ	মধ্যমপুরুষ	প্রথমপুরুষ
সাধারণ/নিত্য বর্তমান	করি	কর করিস করেন	করে করেন
ঘটমান বর্তমান	করিতেছি (করছি)	করিতেছ (করছ) করিতেছিস (করছিস) করিতেছেন (করেছেন)	করিতেছে (করছে) করিতেছেন (করেছেন)
পুরাঘটিত বর্তমান	করিয়াছি (করেছি)	করিয়াছ (করেছ) করিয়াছিস (করেছিস) করিয়াছেন (করেছেন)	করিয়াছে (করেছে) করিতেছেন (করেছেন)
বর্তমানকালের অনুজ্ঞা	×	কর কর করুন	করুক করুন

● অতীত কাল

প্রকার	উত্তমপুরুষ	মধ্যমপুরুষ	প্রথমপুরুষ
সাধারণ/নিত্য অতীত	করিলাম (করলাম, করলুম, করলেম)	করিলে (করলে) করিলি (করলি) করিলেন (করলেন)	করিল (করল) করিলেন (করলেন)
নিত্যবৃত্ত অতীত	করিতাম (করতাম, করতুম, করতেন)	করিতে (করতে) করিতিস (করতিস) করতেন (করতেন)	করিত (করত) করিতেন (করতেন)
ঘটমান অতীত	করিতেছিলাম (করছিলাম, করছিলুম, করছিলাম)	করিতেছিলে (করছিলে) করিতেছিলি (করছিলি) করিতেছিলেন (করছিলেন)	করিতেছিল (করছিল) করিতেছিলেন (করতেন)
পুরাঘটিত অতীত	করিয়াছিলাম (করেছিলাম)	করিয়াছিলে (করেছিলে) করিয়াছিলি (করেছিলি) করিয়াছিলেন (করেছিলেন)	করিয়াছিল (করেছিল) করিয়াছিলেন (করেছিলেন)

● ভবিষ্যৎ কাল

প্রকার	উত্তমপুরুষ	মধ্যমপুরুষ	প্রথমপুরুষ
সাধারণ ভবিষ্যৎ	করিব (করব)	করিবে (করবে) করিবি (করবি) করিবেন (করবেন)	করিবে (করবে) করিবেন (করবেন)
ঘটমান ভবিষ্যৎ	করিতে থাকিব (করতে থাকব)	করিতে থাকিবে (করতে থাকবে) করিতে থাকিবি (করতে থাকবি) করিতে থাকিবেন (করতে থাকবেন)	করিতে থাকিবে (করতে থাকবে) করিতে থাকিবেন (করতে থাকবেন)
পুরাঘটিত ভবিষ্যৎ	করিয়াছি (করেছি)	করিয়াছ (করেছ) করিয়াছিস (করেছিস) করিয়াছেন (করেছেন)	করিয়াছে (করেছে) করেতেছেন (করেছেন)
ভবিষ্যতের অনুজ্ঞা	×	করিবে (করবে) করিও (করো) করিবি (করবি) করিস (করিস)	করিবেন (করবেন) করিবে (করবে) করিবেন (করবেন)



১. ঠিক বিকল্পটি বেছে নিয়ে বাক্যটি আবার লেখো :

১.১ কালকে আমরা প্রধানতযে কভাগে ভাগ করতে পারি—

(ক) দুই (খ) তিন (গ) চার (ঘ) পাঁচ

১.২ যে ক্রিয়া এখন সংঘটিত হচ্ছে তাকে বলা হয়—

(ক) নিত্য বর্তমান (খ) ঘটমান বর্তমান (গ) পুরাঘটিত বর্তমান
(ঘ) ঘটমান অতীত

১.৩ আমি তো এসে গেছি। — এই বাক্যের ক্রিয়ার কালটি হলো :

(ক) অতীত কাল (খ) পুরাঘটিত অতীত
(গ) পুরাঘটিত বর্তমান (ঘ) ঘটমান বর্তমান

১.৪ ভারত সরকার তাঁকে পদ্মভূষণ উপাধিদানে সম্মানিত করেন।’

—এই বাক্যের ক্রিয়ার কালটি হলো :

(ক) নিত্য বর্তমান (খ) ঘটমান বর্তমান (গ) পুরাঘটিত বর্তমান
(ঘ) সাধারণ অতীত

- ১.৫ আমি যখন চোঁটাতে থাকব, তুই এসে আমাকে সমলানোর অভিনয় করতে থাকবি। — এই বাক্যে সমাপিকা ক্রিয়া দুটির কাল হলো :
- (ক) সাধারণ বর্তমান ও সাধারণ ভবিষ্যৎ (খ) ঘটমান বর্তমান ও ঘটমান ভবিষ্যৎ
(গ) দুটিই ঘটমান বর্তমান (ঘ) দুটিই ঘটমান ভবিষ্যৎ
- ১.৬ কাল ও পুরুষানুসারে যে ধ্বনি বা ধ্বনিগুচ্ছ ধাতুর সঙ্গে যুক্ত হয়ে ক্রিয়াপদ গঠন করে, সেই ধ্বনি বা ধ্বনিগুচ্ছকে বলে—
- (ক) ক্রিয়াবিভক্তি (খ) ক্রিয়ার কাল (গ) ক্রিয়ার ভাব (ঘ) ক্রিয়ার ধাতু।
- ১.৭ ‘আমি যদি ক্যাপ্টেন হই, তাহলে চারজন স্ট্রাইকার নিয়ে খেলব।’— এটি ক্রিয়ার কোন ভাবের উদাহরণ?
- (ক) নির্দেশক (খ) বর্তমান অনুজ্ঞা (গ) ভবিষ্যৎ অনুজ্ঞা (ঘ) আপেক্ষিক ভাব
- ১.৮ ‘আগামী তিনদিনের মধ্যে কাজটি দাও।’ — এটি ক্রিয়ার কোন ভাবের উদাহরণ —
- (ক) নির্দেশক (খ) বর্তমান অনুজ্ঞা (গ) ভবিষ্যৎ অনুজ্ঞা (ঘ) আপেক্ষিক ভাব
- ১.৯ ‘সত্য সেলুকাস! কী বিচিত্র এই দেশ!’ — এই বাক্যটি সম্পর্কে নীচের কোন বক্তব্যটি ঠিক —
- (ক) এটি বর্তমান কাল ও বর্তমান অনুজ্ঞার উদাহরণ
(খ) এটি বর্তমান কাল ও নির্দেশক ভাবের উদাহরণ
(গ) এটি অতীত কাল ও অতীত অনুজ্ঞার উদাহরণ
(ঘ) এটি অতীত কাল ও নির্দেশক ভাবের উদাহরণ
- ১.১০ নীচের কোনটি মৌলিক কালের উদাহরণ —
- (ক) পুরাঘটিত নিত্যবৃত্ত (গ) নিত্যবৃত্ত অতীত
(খ) পুরাসম্ভাব্য নিত্যবৃত্ত (ঘ) নিত্যবৃত্ত বর্তমান
২. নির্দেশ অনুযায়ী নীচের প্রশ্নগুলির উত্তর দাও :
- ২.১ কালকে প্রধানত কয়টি ভাগে ভাগ করা হয়?
- ২.২ বর্তমান কাল বলতে কী বোঝায় একটি উদাহরণসহ লেখো।
- ২.৩ পুরাঘটিত বর্তমান ও ঘটমান বর্তমানের মধ্যে পার্থক্য লেখো।
- ২.৪ ক্রিয়ার ভাব বলতে কী বোঝায় একটি উদাহরণসহ লেখো।
- ২.৫ ক্রিয়াবিভক্তি কাকে বলে?
- ২.৬ বাক্যের মধ্যে ক্রিয়াপদটি কীভাবে গঠিত হয়?
- ২.৭ আপেক্ষিক ভাবের একটি উদাহরণ দাও।
- ২.৮ নিত্যবৃত্ত বলতে কী বোঝায়? যেকোনো একটি কালের সাপেক্ষে উদাহরণ দাও।
- ২.৯ ঘটমান অতীতের উত্তমপুরুষ যদি হয় ‘ছিলাম’ তাহলে ঘটমান ভবিষ্যতের মধ্যমপুরুষ কী হবে?
- ২.১০ অতীত অর্থে বর্তমানকালের ক্রিয়ার একটি উদাহরণ দাও।



অর্থসম্বন্ধযুক্ত দুই বা দুয়ের বেশি পদের মিলিত হওয়ার নাম সমাস।

‘সমাস’ শব্দটির অর্থ হলো ‘সংক্ষিপ্ত করা’ (সম্ — √অস্ + অ (ঘঞ) = সমাস)। সমাস-এর আলোচনায় যে পরিভাষা গুলির সঙ্গে আমাদের পরিচয় থাকা প্রয়োজন :

- **সমাস পদ :** যে কটি পদ মিলে সমাস হয় তার প্রতিটিকে বলা হয় সমস্যমান পদ।
‘হাতঘড়ি’ এই সমাসবদ্ধ পদে হাতে পরিবার ঘড়ি এই তিনটি সমস্যমান পদ।
- **ব্যাসবাক্য :** যে বাক্য বা ব্যাকাংশ দিয়ে সমস্যমান পদগুলোর অর্থ ব্যাখ্যা করা হয়, তাকে বলে ব্যাসবাক্য বা বিগ্রহবাক্য (ব্যাস, বিগ্রহ = বিশ্লেষণ) এখানে, হাতে পরিবার ঘড়ি = ব্যাসবাক্য বা বিগ্রহবাক্য।
- **সমস্তপদ :** সমাস করে যে নতুন পদটি হয়, তাকে বলে সমস্ত পদ। হাতঘড়ি = সমস্ত পদ
- **পূর্বপদ :** সমস্যমান পদগুলোর প্রথমটির নাম পূর্বপদ। রাজার = পূর্বপদ।
- **পরপদ :** সমস্যমান পদগুলোর শেষেরটির বা পরের পদটির নাম পরপদ বা উত্তরপদ।
পরিবার ঘড়ি = পরপদ বা উত্তরপদ। (উত্তর = পরবর্তী)।

অর্থাৎ সন্ধি ও সমাস—উভয়ের কাজই শব্দসমূহের সংক্ষিপ্তকরণ। কিন্তু উভয়ের মধ্যে কিছু পার্থক্যও আছে। সেগুলি হল —

সন্ধি ও সমাসের পার্থক্য	
সন্ধি	সমাস
১. সন্ধিতে সন্ধিহিত ধ্বনিসমূহের মিলন ঘটে।	১. সমাসে অর্থসম্বন্ধযুক্ত একাধিক পদের একপদে পরিণতি ঘটে।
২. সন্ধির ধ্বনিগত মিলন লক্ষ করা যায়।	২. সমাসের পদগত মিলন লক্ষ করা যায়।
৩. সন্ধিতে প্রতিটি পদের অর্থ অক্ষুণ্ণ থাকে।	৩. একমাত্র দ্বন্দ্ব সমাসে প্রতিটি পদের অর্থ অক্ষুণ্ণ থাকে। তৎপুরুষ ও কর্মধারয়

সন্ধি	সমাস
৪. সন্ধিতে বিভক্তি লোপের বিষয়টিই নেই।	সমাসে পরপদের অর্থপ্রাধান্য থাকে। অব্যয়ীভাবে পূর্বপদের অর্থপ্রাধান্য এবং বহুব্রীহিতে ইঙ্গিত রয়েছে এমন তৃতীয় একটি পদের অর্থপ্রাধান্য।
৫. সন্ধিতে শব্দের অর্থের কোনো পরিবর্তন ঘটে না।	৪. সমাসে অধিকাংশ ক্ষেত্রে পূর্বপদের বিভক্তি চিহ্ন লোপ পায়।
৬. সন্ধিতে পদগুলির ক্রম অক্ষুণ্ণ থাকে।	৫. সমাসে শব্দের অর্থের অনেক রকমের পরিবর্তন হয়।
৭. সন্ধিতে কখনই একটি শব্দের জায়গায় অন্য শব্দ আসে না।	৬. সমাসে কোনো কোনো ক্ষেত্রে পদদুটি স্থান পরিবর্তন করে।
	৭. সমাসে কোনো কোনো ক্ষেত্রে একটি শব্দের জায়গায় অন্য শব্দ আসে।

সমাসের শ্রেণিবিভাগ

সংস্কৃত ব্যাকরণে অর্থপ্রাধান্য অনুসারে সমাস প্রধানত চার ভাগে বিভক্ত : ১. অব্যয়ীভাব, ২. তৎপুরুষ, ৩. দ্বন্দ্ব ও ৪. বহুব্রীহি।

কর্মধারয়, দ্বিগু ও তৎপুরুষ সমাসে পরপদ বা উত্তর পদের অর্থ প্রধান, দ্বন্দ্ব সমাসে উভয়পদেরই অর্থ প্রধান, বহুব্রীহিতে সমস্যমান পদদুটি ব্যতীত অন্য একটি পদের অর্থ প্রধান। তবে উত্তরপদের অর্থ প্রাধান্য পায় বলে কর্মধারয় ও দ্বিগু সমাসকে সংস্কৃত ব্যাকরণে তৎপুরুষ সমাসের অন্তর্গত বলে ধরা হয়। কিন্তু বাংলা ব্যাকরণে কর্মধারয় ও দ্বিগুকে পৃথক সমাস হিসেবেই ধরা হয়।

বাংলা ব্যাকরণ অনুযায়ী সমাস এই আট প্রকার : ১. কর্মধারয়, ২. তৎপুরুষ, ৩. দ্বন্দ্ব, ৪. বহুব্রীহি, ৫. দ্বিগু, ৬. নিত্য সমাস, ৭. অলোপ সমাস ও ৮. বাক্যাশ্রয়ী সমাস।

১. কর্মধারয় সমাস

যে সমাসের পূর্বপদ সাধারণত পরপদের বিশেষণ হিসেবে থাকে এবং সমাসবন্ধ পদে পরপদের অর্থই প্রধান হয়, তাকে কর্মধারয় সমাস বলে। কর্মধারয় সমাসের বিভিন্ন শ্রেণিবিভাগগুলি নীচে আলোচনা করা হলো :

১.১ সাধারণ কর্মধারয়

• বিশেষণ—বিশেষ্য •

পূর্ণ যে চন্দ্র = পূর্ণচন্দ্র

উড়ো যে জাহাজ = উড়োজাহাজ

মেজো যে মামা = মেজোমামা

নীল যে আকাশ = নীলাকাশ

একইভাবে : খাসমহল, সুপুরুষ, বিকচকেতকী, শ্বেতচন্দন, হেডমাস্টার, পীতাম্বর, ধ্রুবতারা, মিষ্টান্ন, শুচিবস্ত্র, নবযৌবন, কালফাঁদ, রক্তচন্দন, কড়াপাক, হাফমোজা, কাঁচকলা, গন্ডগ্রাম।

• বিশেষ্য—বিশেষণ (পূর্বনিপাত) •

ভাজা যে পটল = পটলভাজা

সেদ্ব যে ডিম = সেদ্বডিম

কতক যে দিন = দিনকতক

বাটা যে হলুদ = হলুদবাটা

• বিশেষণ—বিশেষণ •

যা অল্প তাই মধুর = অল্পমধুর

যা স্নিগ্ধ তাই উজ্জ্বল = স্নিগ্ধোজ্জ্বল

যে চালাক সেই চতুর = চালাকচতুর

যিনি গণ্য তিনিই মান্য = গণ্যমান্য

• বিশেষ্য—বিশেষ্য •

যা গঙ্গা তাই নদী = গঙ্গানদী

যা হিমালয় তাই পর্বত = হিমালয় পর্বত

যিনি গুরু তিনিই দেব = গুরুদেব

যিনি চিৎ তিনিই আনন্দ = চিদানন্দ

একইভাবে : গিনিমা, গোলাপফুল, পণ্ডিতমশাই, মাতৃদেবী, ভারতভূমি।

• আগে—পরে •

আগে ধোয়া পরে মোছা = ধোয়ামোছা পূর্বে সুপ্ত পরে উথিত = সুপ্তোথিত

আগে কাটা পরে বাছা = কাটাবাছা

১.২ উপমিত কর্মধারয়

যে কর্মধারয় সমাসের পূর্বপদে উপমেয় (যাকে তুলনা করা হচ্ছে) ও উত্তরপদে উপমান (যার সঙ্গে তুলনা করা হচ্ছে) থাকে এবং যেখানে সাধারণ ধর্মের উল্লেখ থাকে না, তাকে উপমিত কর্মধারয় সমাস বলে। এখানে পূর্বপদ ও উত্তরপদ দুটিই বিশেষ্য; কিন্তু উত্তরপদটিতে বিশেষণের ভাব থাকে। যেমন:

পুরুষ সিংহের মতো = পুরুষসিংহ

কর পল্লবের মতো = করপল্লব

চরণ পদ্মের মতো = চরণপদ্ম

কথা অমৃতের তুল্য = কথামৃত

• পূর্বপদে উপমান ও উত্তরপদে উপমেয় •

চাঁদের মতো মুখ = চাঁদমুখ

অগ্নির মতো দৃষ্টি = অগ্নিদৃষ্টি

সিংহের মতো শিশু = সিংহশিশু

কদমের মতো ছাঁট = কদমছাঁট

একইভাবে : চরণকমল, পলাশলোচন, চন্দ্রানন, চরিতামৃত, বাহুলতা

১.৩ উপমান কর্মধারয়

যে কর্মধারয় সমাসের পূর্বপদ উপমান ও উত্তরপদে সাধারণ ধর্ম থাকে তাকে উপমান কর্মধারয় সমাস বলে। এখানে পূর্বপদটি বিশেষ্য ও উত্তরপদটি বিশেষণ। যেমন:

কাজলের মতো কালো = কাজলকালো হস্তীর মতো মুখ = হস্তীমুখ

বিড়ালের মতো তপস্বী = বিড়ালতপস্বী বকের মতো ধার্মিক = বকধার্মিক

১.৪ রূপক কর্মধারয়

যে কর্মধারয় সমাসে পূর্বপদে উপমেয় এবং উত্তরপদে উপমান এবং এদের মধ্যে অভেদ বা অভিন্নতা

কল্পনা করা হয়, তাকে **রূপক কর্মধারয় সমাস** বলে। যেমন:

মন রূপ মাঝি = মনমাঝি

দুঃখ রূপ অনল = দুঃখানল

জীবন রূপ নদ = জীবননদ

প্রাণ রূপ পাখি = প্রাণপাখি

১.৫ মধ্যপদলোপী কর্মধারয়

কর্মধারয় সমাসে ব্যাসবাক্যের মধ্যবর্তী এক বা একাধিক পদ লোপ পায় তাকে মধ্যপদলোপী কর্মধারয় সমাস বলে। যেমন:

শহিদ স্মরণে পালিত দিবস = শহিদদিবসনীতি বিষয়ক শাস্ত্র = নীতিশাস্ত্র

একইভাবে : বরফজল, রাষ্ট্রনীতি, জয়োল্লাস, মানিব্যাগ, অনুষ্ঠানপত্র।

উপমান কর্মধারয়, উপমিত কর্মধারয় এবং রূপক কর্মধারয় — এই তিন রকমের কর্মধারয় সমাসকে উপমার সাহায্যে সাদৃশ্য কল্পনা করা হয় বলে এদের **উপমামূলক কর্মধারয় সমাস** বলতে পারি।

২. তৎপুরুষ সমাস

যে সমাসের পূর্বপদের বিভক্তি লোপ পায় এবং পরপদের অর্থ প্রধানরূপে প্রতীয়মান হয়, তাকে **তৎপুরুষ সমাস** বলে। এই সমাসে পূর্বপদের কর্ম করণ অপাদান ইত্যাদি কারকের বিভক্তিচিহ্ন বা বিভক্তিস্থানীয় অনুসর্গ লোপ পায়। এই সমাসের ব্যাসবাক্য গঠন করতে পূর্বপদে অর্থ অনুযায়ী কর্ম করণ অপাদান অধিকরণ ইত্যাদি কারকের বিভক্তিচিহ্ন বা বিভক্তিস্থানীয় অনুসর্গ যোগ করতে হয়। তৎপুরুষ সমাসের বিভিন্ন শ্রেণিবিভাগ ও তার উদাহরণগুলি নীচে দেওয়া হলো :

২.১ কর্ম তৎপুরুষ

কাপড়কে কাচা = কাপড়কাচা

চরণকে আশ্রিত = চরণাশ্রিত

হস্তকে গত = হস্তগত

কলাকে বেচা = কলাবেচা

একইভাবে : লুচিভাজা, তরীবাওয়া, গাঁটকাটা, লোকদেখানো, দেশোদ্धार।

২.২ করণ তৎপুরুষ

রোগ দ্বারা আক্রান্ত = রোগাক্রান্ত

দা দিয়ে কাটা = দাকাটা

টেকি দ্বারা ছাঁটা = টেকিছাঁটা

আশার দ্বারা হত = আশাহত

শ্রী দ্বারা হীন = শ্রীহীন

রক্ত দ্বারা শূন্য = রক্তশূন্য

একইভাবে : ট্রেনভ্রমণ, কলেছাঁটা, বজ্রাহত, রবীন্দ্ররচিত, শোকার্ত, অশুভরা, গুরুদত্ত, তুষার্ত, আশাহত, বিদ্যাহীন, জ্ঞানশূন্য, যুক্তিহীন, জনশূন্য।

২.৩ নিমিত্ত তৎপুরুষ

তপের নিমিত্ত বন = তপোবন

উন্নতির জন্য বিধান = উন্নতিবিধান

তীর্থের জন্য যাত্রা = তীর্থযাত্রা

ভাণ্ডারের নিমিত্ত ঘর = ভাণ্ডারঘর

২.৪ অপাদন তৎপুরুষ

মৃত হইতে ভয় = মৃত্যুভয়

দুগ্ধ থেকে জাত = দুগ্ধজাত

জন্ম থেকে অন্ধ = জন্মান্ধ

রোগ থেকে মুক্ত = রোগমুক্ত

একইভাবে : ঐশ্বর্যব্রষ্ট, জন্মস্বাধীন, ঋণমুক্ত, স্কুলফেরতা, খাপখোলা, চাকভাঙা, বন্যাত্রাণ।

২.৫ সম্বন্ধ তৎপুরুষ

র, এর : রাজার পুত্র = রাজপুত্র

মৃগের শিশু = মৃগশিশু

মাতার মুক্তি = মাতৃমুক্তি

জগতের জন = জগজ্জন

পূর্বনিপাত : রোগের রাজা = রাজরোগ

তরুর রাজা = রাজতরু

মিস্ত্রিদের রাজা = রাজমিস্ত্রি

হংসের রাজা = রাজহংস

একইভাবে : সিপাহিবিরোধ, শ্বশুরবাড়ি, মউচাক, গঙ্গামাটি, ব্রাহ্মসমাজ, রাজভৃত্য, রাজধানী, সুধাকর, ঘনঘটা, আঁখিলোর, গুণীসমাজ।

২.৬ অধিকরণ তৎপুরুষ

এ, য়, তে : গৃহে বাস = গৃহবাস

জলে মগ্ন = জলমগ্ন

বস্তায় বন্দি = বস্তাবন্দি

গলায় ধাক্কা = গলাধাক্কা

বাটাতে ভরা = বাটাভরা

মাথাতে ব্যথা = মাথাব্যথা

একইভাবে : বিলেতবাস, গঙ্গাস্নান, অরণ্যজাত, কর্মব্যস্ত, আকাশভ্রমণ, মনমরা।

২.৭ না-তৎপুরুষ

নয় মঞ্জুর = না মঞ্জুর

নয় আচার = অনাচার

নাই খোঁজ = নিখোঁজ

নয় সাধ্য = অসাধ্য

একইভাবে : গররাজি, অনাবাদি, অনাসৃষ্টি, নগণ্য, নিখরচা, বিজোড়, অনাবৃষ্টি।

২.৮ উপপদ তৎপুরুষ

গৃহে স্থ (আছেন) যিনি = গৃহস্থ

খনিতে জন্মে যা = খনিজ

মধু পান করে যে = মধুপ

পদ দ্বারা পান করে যে = পাদপ

একইভাবে : অগ্রজ, দেশজ, প্রকৃতিস্থ, দূরবস্থ, কণ্টস্থ, মোক্ষদা, বরদা, জনদ, বনস্থ,

অগ্রে গমন করে যে = অগ্রগামী

ইন্দ্রিয়কে জয় করেছেন যিনি = জিতেন্দ্রিয়

জ্ঞান হারিয়েছে যে = জ্ঞানহারা

শত্রুকে হত্যা করে যে = শত্রুঘ্ন

একইভাবে : মিথ্যাবাদী, দ্বাররক্ষী, শৃঙ্গধর, মণিকার, কুস্তকার, রণজিৎ, ঘরছাড়া, অরিন্দম।

● একদেশী তৎপুরুষ ●

(দেশ = অংশ)

দরিয়ার মাঝ = মাঝদরিয়া

অহের অপরভাগ = অপরাহু

একইভাবে : মধ্যাহ্ন, পূর্বাহ্ন, মাঝনদী।

২.৯ ব্যাপ্তি তৎপুরুষ

বাংলায় ‘ব্যাপ্তি’ বোঝাতে কোনো আলাদা বিভক্তি ব্যবহৃত হয় না। তাই বাংলায় এ ধরনের সমাসকে ব্যাপ্তি তৎপুরুষ সমাস বলা হয়। যেমন —

চিরকাল ব্যাপিয়া যুবা = চিরযুবা

জীবন ব্যাপিয়া আনন্দ = জীবনানন্দ

চিরকাল ব্যাপিয়া হরিৎ = চিরহরিৎ

বিশ্ব ব্যাপিয়া যুদ্ধ = বিশ্বযুদ্ধ

একইভাবে : চিরশত্রু, চিরসন্ত, ক্ষীণস্থায়ী, চিরসুখী।

(ঞ) ক্রিয়াবিশ্লেষণ তৎপুরুষ

অর্ধভাবে মৃত = অর্ধমৃত

নিম্ন ভাবে রাজি = নিম্নরাজি

আধ ভাবে পাকা = আধপাকা

অর্ধভাবে স্ফুট = অর্ধস্ফুট

(ট) উপসর্গ তৎপুরুষ

যে সমাসের পূর্বপদে এ, বি, উৎ প্রভৃতি উপসর্গ থাকে, তাকে উপসর্গ তৎপুরুষ সমাস বলে।

দ্বীপের সদৃশ = উপদ্বীপ

আচার্যের সদৃশ = উপাচার্য

বিধিকে অতিক্রম না করে = যথাবিধি

নদীর সাদৃশ = উপনদী

একইভাবে : যথার্থ, যথেষ্ট, ঠিকমতো, রীতিমতো, যথালভ, বিখ্যাত, উপকণ্ঠ, যথেষ্ট

ভিক্ষার অভাব = দুর্ভিক্ষ

ভাতের অভাব = হাভাত

আমিষের অভাব = নিরামিষ

মিলের অভাব = গরমিল

বিয়ের অভাব = নির্বিঘ্ন

সুরের অভাব = বেসুর

একইভাবে : বেগতিক, বেকসুর, হাঘরে, বেইজ্জত, না-মিস্তি, না-টক।

ক্ষণে ক্ষণে = প্রতিক্ষণ, অনুক্ষণ

বছর বছর = ফি-বছর

অঙে অঙে = প্রত্যঙে

কণ্ঠ পর্যন্ত = আকণ্ঠ

হাঁটু পর্যন্ত = হাঁটুনাগাল

আদি থেকে অন্ত পর্যন্ত = আদ্যন্ত

একইভাবে : আমৃত্যু, আমরণ, আজীবন, আশৈশব, আকৈশোর, আযৌবন, আজানু, আদ্যোপান্ত,

আমূল, গলানাগাল, আবালবৃন্দবনিতা, যাবজ্জীবন, আসমুদ্র, আকর্ণ, আবাল্য।

পক্ষের বিপরীত = প্রতিপক্ষ

রূপের যোগ্য = অনুরূপ

গুণের যোগ্য = অনুগুণ

ক্ষুদ্র গ্রহ = উপগ্রহ

তাপের পশ্চাৎ = অনুতাপ

রণের পশ্চাৎ = অনুরণন

৩. দ্বন্দ্ব সমাস

দ্বন্দ্ব শব্দের অর্থ ‘যুক্ত’। এই সমাসে ‘ও’ এবং ‘আর’ সংযোজক পদ দিয়ে পূর্বপদ ও উত্তর পদ যুক্ত হয়। সমাসবন্ধ পদে, সংযোজক লুপ্ত হয় এই সমাসে উভয়পদের অর্থই প্রাধান্য পায়।

দেব ও দ্বিজ = দেবদ্বিজ

গুরু ও শিষ্য = গুরুশিষ্য

দিন ও রাত = দিনরাত

বর ও বধু = বরবধু

অন্ন ও বস্ত্র = অন্নবস্ত্র

মাতা ও পিতা = মাতাপিতা

৩.১ দুটি বিশেষ্য পদের দ্বন্দ্ব

ধর্ম ও কর্ম = ধর্মকর্ম

ফুল ও ফল = ফুলফল

ভাই ও বোন = ভাইবোন

কুশ ও লব = কুশীলব

স্বর্গ ও মর্ত্য = স্বর্গমর্ত্য

জন্ম ও মৃত্যু = জন্মমৃত্যু

একইভাবে : বইখাতা, চন্দ্রসূর্য, গ্রহনক্ষত্র, বন্ধুবান্ধব, যাতায়াত, রক্তমাংস, জামাকাপড়, স্কুলকলেজ, চোখকান, হাতপা, পথঘাট, ছেলেমেয়ে, বউঝি, কইমাগুর, শালসেগুন, সুখশান্তি, নদনদী, দাসদাসী, পিতাপুত্র, মাসিপিসি, দরজা-জানালা, ধুতিচাদর, গোরুবাছুর, মুড়িমুড়কি, পড়াশোনা, নাচগান, বলা-কওয়া, আসা-যাওয়া, ধোয়ামোছা, দেখাশোনা, কায়দাকানুন, যুগযুগান্তর, নিশিদিন, ধানদুর্বা, অশনবসন।

৩.২ দুই সর্বনাম পদের দ্বন্দ্ব

তুমি ও আমি = তুমি-আমি

আমার ও তোমার = আমার-তোমার

একইভাবে : একে-ওকে, যাকে-তাকে, একে-তাকে, যে-সে, যার-তার, এটা-সেটা, ইনি-উনি,

৩.৩ দুই বিশেষণ পদের দ্বন্দ্ব

ভালো ও মন্দ = ভালোমন্দ

সাদা ও কালো = সাদাকালো

ধনী ও দরিদ্র = ধনীদরিদ্র

হিত ও অহিত = হিতাহিত

একইভাবে : ন্যায়-অন্যায়, সহজসরল, ক্ষুদ্র-বৃহৎ, ছোটোবড়ো, উচ্চনীচ, উঁচুনীচু, নীললোহিত, হতাহত, কাঁচাপাকা, চেনা-অচেনা, লঘুগুরু, টকঝাল, ইতরভদ্র, কাটাছেঁড়া, আঁকাবাঁকা, বাঁকাট্যারা, নাদুসনুদুস, গোলমাল, সত্যমিথ্যা, ঠান্ডাগরম, নরমে গরমে, লালনীল, সরুমোটা।

৩.৪ দুই ক্রিয়াপদের দ্বন্দ্ব

হেসে ও খেলে = হেসেখেলে

হেসে ও কেঁদে = হেসেকেঁদে

নেচে ও গেয়ে = নেচেগেয়ে

রেখে ও ঢেকে = রেখেঢেকে

একইভাবে : হারজিত, পড়িমরি, বলে-কয়ে, শুষেবসে, চেয়েচিন্তে, দেখেশুনে, দিয়েথুয়ে, কেঁদে ককিয়ে, হেঁটে-চলে, জেনেশুনে, চলাফেরা, নাচ-গাও, দেখ-শোন।

৩.৫ সমার্থক দ্বন্দ্ব

শাক ও সবজি = শাকসবজি

অন্য ও অন্য = অন্যান্য

একইভাবে : মাথামুণ্ড, ছাইভস্ম, ছাইপাঁশ, ছেলেছোকরা, লোকজন, হাটবাজার, লজ্জাশরম, ঘরবাড়ি, খালবিল, নদীনালা, বনজঙ্গল, চিঠিপত্র, কাজকর্ম, ডাক্তারবদ্যি, জনমানব, গা-গতর, ঠাট্টা-মশকরা, মায়ামমতা, যাগযজ্ঞ, দয়ামায়া, মামলামোকদ্দমা, ভয়ডর, চালাক-চতুর।

৩.৬ বিপরীতার্থক দ্বন্দ্ব

সুর ও অসুর = সুরাসুর

পাপ ও পুণ্য = পাপপুণ্য

একইভাবে : দোষাপাওনা, কাঁচাপাকা, অহোরাত্র, জন্মমৃত্যু, মিঠেকড়া, স্বর্গনরক, দিনরাত, সকাল-সন্ধ্যা, জোয়ারভাটা, চোরডাকাত, চোরপুলিশ, আসলনকল, আকাশপাতাল, দেওরননদ, স্বামীস্ত্রী, বরবধু, জলস্থল, হাসিকান্না, ক্রয়বিক্রয়, কেনাবেচা, জয়পরাজয়।

৩.৭ একশেষ দ্বন্দ্ব

আমি, তুমি ও সে = আমরা

তুমি ও সে = তোমরা

৩.৮ বহুপদী দ্বন্দ্ব

রাম ও লক্ষ্মণ ও ভরত ও শত্রুঘ্ন = রাম-লক্ষ্মণ-ভরত-শত্রুঘ্ন

রূপ ও রস ও গন্ধ ও স্পর্শ = রূপ-রস-গন্ধ-স্পর্শ

একইভাবে : শঙ্খ-চক্র-গদা-পদ্ম, পাইক-পেয়াদা-সেপাই-সান্ত্বী, ব্রহ্মা-বিষ্ণু-মহেশ্বর, হিন্দু-মুসলমান-শিখ-বৌদ্ধ, ধর্ম-অর্থ-কাম-মোক্ষ, চন্দ্র-সূর্য-গ্রহ-তারা।

৪. বহুব্রীহি সমাস

যে দুটি পদের সমাস হয়, সমাসবন্ধ পদে তাদের কোনোটিকে না বুঝিয়ে তৃতীয় কোনো ব্যক্তি বা বস্তুকে বোঝালে বহুব্রীহি সমাস হয়।

বীণা পাণিতে যার = বীণাপাণি

এখানে ‘বীণা’ বা ‘পাণি’ (হাত) না বুঝিয়ে ‘বীণাপাণি’ অর্থে দেবী সরস্বতীকে বোঝানো হয়েছে। যে দুটি পদের সমাস হবে সেই দুটি পদের একই বিভক্তি হলে, সমানাধিকরণ [সমান + অধিকরণ (=বিভক্তি) = সমানাধিকরণ] বহুব্রীহি সমাস বলা হয়। এক্ষেত্রে পূর্বপদটি বিশেষণ ও পরপদটি বিশেষ্য হয়। যেমন:

বহু ব্রীহি (ধান) যার = বহুব্রীহি

নদী মাতা যার = নদীমাতৃক

সমান অর্থ যাদের = সমার্থক

হত ভাগ্য যার = হতভাগা

অল্প বয়স যার = অল্পবয়স

স্বচ্ছ সলিল যার = স্বচ্ছসলিলা

একইভাবে : পীতাম্বর, শ্যামাঙ্গী, মুখপোড়া, স্বপ্নায়ু, মধ্যবয়সি, কৃতবিদ্য, একরোখা, দিগম্বর, এলাকেশী, একচোখা, মা-মরা, পালতোলা, হীরেবসানো।

যে দুটি পদের সমাস হবে সেই দুটি পদের বিভক্তি আলাদা বা বিভিন্ন হলে, তাকে ব্যধিকরণ (বি = বিভাগ) + অধিকরণ (= বিভক্তি) বলা হয়। এতে দুটি পদই বিশেষ্য এবং যে- কোনো একটি পদে ‘এ’ বিভক্তি লক্ষ করা যায়। যেমন:

নীল কণ্ঠে যার = নীলকণ্ঠ

পাতায় বাহার যার = পাতাবাহার

শূল পাণিতে যার = শূলপাণি

শশ অঙ্কে যার = শশাঙ্ক

পদ্মে আসন যার (স্ত্রী) = পদ্মাসনা

ধর্মে মতি যার = ধর্মমতি

একইভাবে : চন্দ্রচূড়, বীণাপাণি, উর্ণনাভ, পাপবুদ্ধি, হিরণ্যগর্ভ, অন্যমনস্ক, পিনাকপাণি, বজ্রপাণি, গোঁফখোঁজুরে।

বর্তমানে বহুব্রীহি সমাসকে নিম্নোক্তরূপে ভাগ করা হয়েছে :

৪.১ মধ্যপদলোপী বা উপমাত্মক বহুব্রীহি (এক্ষেত্রে ব্যাসবাক্যে ব্যাখ্যামূলক পদলুপ্ত হয় এবং উপমা বোঝানো হয়ে থাকে) —

চুল চিরলে যতটা সূক্ষ্ম হয় ততটা সূক্ষ্ম যা = চুলচেরা

ডাকাতির বকের মতো বুক যার = ডাকাবুকো

মৃগের নয়নের মতো নয়ন যে নারীর	= মৃগনয়না
চন্দ্ৰের মতো বদন যে নারীর	= চন্দ্রবদনা
চন্দ্ৰের মতো মুখ যে নারীর	= চন্দ্রমুখী

একইভাবে : এগাক্ষী, বিড়ালচোখা, সোনামুখী, পঁচামুখো, পটলচেরা, কপোতাক্ষ, লব্ধপ্রতিষ্ঠ, কুণ্ডকর্ণ, স্থিরপ্রতিজ্ঞ, উঁচকপালি, প্রথিতযশা।

৪.২ ব্যতিহার বহুব্রীহির ক্ষেত্রে (একজাতীয় কাজের পারস্পরিকতা বোঝাতে একই বিশেষ্য পদের দ্বিহের ব্যবহার হয়ে থাকে):

পরস্পর গলায় গলায় যে ভাব	= গলাগলি
পরস্পর হাতে হাতে যে যুদ্ধ	= হাতাহাতি
পরস্পর কোলে টেনে যে আলিঙ্গন	= কোলাকুলি
পরস্পর কেশ আকর্ষণ করে যে কলহ	= কেশাকেশি
পরস্পর হেসে হেসে যে আলাপ	= হাসাহাসি
পরস্পর লাঠিতে লাঠিতে যে কলহ	= লাঠালাঠি

একইভাবে : চুলোচুলি, নখানখি, হানাহানি, চটাচটি, টানাটানি, মারামারি, রক্তারক্তি, তর্কাতর্কি, ঘুষোঘুসি, খুনোখুনি, দলাদলি।

৪.৩ সহার্থক বহুব্রীহি : (পূর্বপদটি সহ-অর্থযুক্ত; স = সহ)

সমান পতি যার = সপত্নী	বিনয়ের সহিত বর্তমান = সবিনয়
ছন্দের সহিত বর্তমান = স্বচ্ছন্দ	উৎসাহের সহিত বর্তমান = সোৎসাহ
স্ত্রীর সহিত বর্তমান = সস্ত্রীক	লজ্জার সহিত বর্তমান = সলজ্জ

একইভাবে : সজোর, সপুত্র, সাদর, সশব্দ, সক্রুণ, সজল, সশঙ্ক, সকৌতুক, সগোত্র, সতীর্থ, সলাজ, সহোদর, সার্থক।

৪.৪ না- বহুব্রীহি : (পূর্বপদ নঞর্থক)

নেই আদি যার = অনাদি	নেই ভেজাল যাতে = নির্ভেজাল
নেই দয়া যার = নির্দয়	নেই বোধ যার = অবোধ
নেই অন্ত যার = অনন্ত	নেই শোক যার = অশোক

একইভাবে : নির্জলা, নিখোঁজ, অসাড়, নিঃসাড়, নিঃসীম, অসীম, বেহুঁশ, বেহেড, বেইমান, বেপান্তা, বেশরম, বেয়াদব, অনাথ, অবোধ, নির্লজ্জ, নির্ভুল, নির্লোভ, নিরপরাধ, অভ্রান্ত, বিশৃঙ্খলা, অপয়া, অনিমেষ, অকূল, নিরুপায়, নীরব, নির্ধন, নির্বাক, নিখুঁত।

৪.৫ সংখ্যা বহুব্রীহি : (পূর্বপদ সংখ্যাবাচক বিশেষণ ও উত্তরপদ বিশেষ্য)

দশ আনন যার = দশানন	দ্বি (দু-দিকে) অপ্ যার = দ্বীপ
ত্রি শঙ্কু (দোষ) যার = ত্রিশঙ্কু	পঞ্চ আনন যার = পঞ্চানন
চতুঃ (চার) পদ যার = চতুষ্পদ	চতুঃ (যার) মুখ যার = চতুর্মুখ

একইভাবে : একবয়সি, পাঁচহাতি, দোনলা, দোচালা, আটচালা, একপেশে, একরোখা, একগুঁয়ে, তেপায়া, সমবয়সি, দোতলা, তেতালা।

৫. দ্বিগু সমাস

যে সমাসে পূর্বপদ সংখ্যাবাচক বিশেষণ এবং উত্তরপদ বিশেষ্য এবং সমাসবন্ধ পদে সমাহার বোঝায়, তাকে দ্বিগু সমাস বলে।

এখানে উত্তরপদের অর্থই প্রধান। দ্বিগু সমাস দুই প্রকার : তদ্ভিতার্থক ও সমাহার।

৫.১ তদ্ভিতার্থক দ্বিগু

দ্বি গো-র বিনিময়ে কেনা = দ্বিগু ; বাংলায় অনুরূপ শব্দ : তিনকড়ি, পাঁচকড়ি, সাতকড়ি, নকড়ি। এদের তদ্ভিতার্থক দ্বিগু বলে।

৫.২ সমাহার দ্বিগু

নব রত্নের সমাহার = নবরত্ন

ত্রি ভুবনের সমাহার = ত্রিভুবন

পাঁচ মাথার সমাহার = পাঁচমাথা

পাঁচ ফোড়নের সমাহার = পাঁচফোড়ন

চৌ (চার) রাস্তার সমাহার = চৌরাস্তা

সপ্ত ঋষির সমাহার = সপ্তর্ষি

একইভাবে : সপ্তাহ, দোতারা, সাতখুন, সাতসমুদ্র, তেরোনদী, ত্রিবেণী, পঞ্চবার্ষিক, ষড়রিপু, পঞ্চনদ, চতুষ্পদ, বারোহাত, তেরাঙির, ষোড়শোপচার, সপ্তসিন্ধু।

• সমাহার দ্বিগু সমাসে কোথাও কোথাও পরপদে ‘আ’ বা ‘ঈ’ যুক্ত হয়। যেমন— শতাব্দী, পঞ্চমী, ত্রিপদী, চতুষ্পদী, শতবার্ষিকী, ত্রিফলা, তেপায়া।

৬. নিত্যসমাস

যে সমাসে সমস্যমান পদগুলো নিত্য অর্থাৎ সর্বদাই সমাসবন্ধ থাকে, তাকে নিত্যসমাস বলে। তাই এর কোনো ব্যাসবাক্য হয় না। এতে স্বপদ অর্থাৎ সমাসের নিজের পদ ব্যবহৃত হয় না বলে এর অন্য নাম ‘অ-স্বপদবিগ্রহ নিত্যসমাস’। নিত্যসমাস কোনো স্বতন্ত্র সমাস নয় ; ব্যাসবাক্যহীন যে-কোনো সমাসকেই নিত্যসমাস বলা যায়। এই সমাসের ব্যাসবাক্য তৈরি করতে হলে অন্য পদের প্রয়োজন হয়।

অন্য দেশ = দেশান্তর

কেবল কণিকা = কণিকামাত্র

অন্য মত = মতান্তর

কেবল জল = জলমাত্র

অন্য যুগ = যুগান্তর

কেবল দর্শন = দর্শনমাত্র

একইভাবে : দেখামাত্র, তন্মাত্র, ইন্দুনিভ, বজ্রসন্নিভ, হস্তান্তর, স্থানান্তর, ধর্মাস্তর, শূলীশভুনিভ, কাঁচকলা, কালসাপ, ভাবান্তর, ভিক্ষামাত্র, নামমাত্র, প্রকারান্তর, কালান্তর, জন্মান্তর।

৭. অলোপ সমাস

সমাসবন্ধ পদে পূর্বপদের বিভক্তি লোপ না পেয়ে তা যখন সমাসবন্ধ পদেই থেকে যায়—তাকে অলোপ (অলোপ = লোপ না পাওয়া) সমাস বলে।

তাই অলোপ সমাস কোনো স্বতন্ত্র সমাস নয়। যে সমাসে সমস্যমান পদের বিভক্তি লোপ পায় না, তাকে সেই সমাসের অন্তর্গত অলোপ সমাস বলা হয়।

৭.১ অলোপ দ্বন্দ্ব :

ঘরে ও বাইরে = ঘরে-বাইরে

একইভাবে : দেশে-বিদেশ, হাতেকলমে, জলেকাদায়, আগেপিছে, মায়েঝিয়ে, হাতেপায়ে, পথেঘাটে, চোখেমুখে, বুকপিঠে, দুধেভাতে, বনেবাদাড়ে।

৭.২ অলোপ করণ তৎপুরুষ :

তেল দ্বারা ভাজা = তেলেভাজা

তমসা দ্বারা আচ্ছন্ন = তমসাচ্ছন্ন

একইভাবে : ঘিয়েভাজা, হাতেকাটা, কলেছাঁটা, মেশিনে বোনা, হাতে আঁকা, রোদে পোড়া, ছিপেগাঁথা, নাকে কান্না, তাসের ঘর, মাটির মানুষ, কাঠের সিঁড়ি, চোখে দেখা, মেঘেঢাকা।

৭.৩ অলোপ নিমিত্ত তৎপুরুষ :

মুড়ির জন্য চাল = মুড়ির চাল

পেটের জন্য খোরাক = পেটের খোরাক

একইভাবে : চায়ের কাপ, পাতার ঘর, খেলার মাঠ, ভাতের হাঁড়ি, পেটের ভাত, জামার কাপড়।

৭.৪ অলোপ অপাদান তৎপুরুষ :

চোখের জল = চোখের জল

সারৎ (সার থেকে) সার = সারাৎসার

একইভাবে : ঘানির তেল, দোকান থেকে আনা, বাজার থেকে কেনা, আকাশ থেকে পড়া, বিদেশ থেকে আনা।

৭.৫ অলোপ সম্বন্ধ তৎপুরুষ :

ভ্রাতুঃ (ভ্রাতুঃ = ভ্রাতার) পুত্র = ভ্রাতুষ্পুত্র

মামার বাড়ি = মামাবাড়ি

পাখির আলয় = পাখিরালয়

বাচঃ (বাক্যের) পতি = বাচস্পতি

একইভাবে : অনুরোধের আসর, ঘরের ছেলে, পরের ছেলে, পরের ধন, ভাগের মা, রাজার মেয়ে, তুষের আগুন, হাতির খোরাক।

৭.৬ অলোপ অধিকরণ তৎপুরুষ : ছাঁচে ঢালা, অঙ্কে কাঁচা, দিনে ডাকাতি, এঁচোড়ে পাকা, অরণ্য রোদন, গোড়ায় গলদ, বাইরে সরল, দুধে আলতা, জলে ডোবা, যুধিষ্ঠির।

৭.৭ অলোপ উপপদ তৎপুরুষ :

খ-এ (বা, তে) চরে যে = খেচর

কলেজে পড়ে যে = কলেজপড়া

জালে পড়েছে যা = জালেপড়া

অন্তে বাস করে যে = অন্তেবাসী

সরসিতে (সরোবরে) জন্মে যা = সরসিজ

রোদে পুড়েছে যা, যে = রোদপোড়া

একইভাবে : জালেপড়া, মনসিজ, গায়েপড়া।

৭.৮ অলোপ বহুব্রীহি :

গায়ে হলুদ দেওয়া হয় যে অনুষ্ঠানে = গায়েহলুদ

ছাতা মাথায় যার, যিনি = ছাতামাথায়

একইভাবে : হাতেখড়ি, লাঠিহাতে, মুখেভাত, পাগড়িমাথা, গলায়মালা, মুখেমধু।

৮. বাক্যাশ্রয়ী সমাস

বাক্য বা বাক্যাংশ যখন সমাসবন্ধ পদ রূপে ব্যবহৃত হয় তখন তাকে বাক্যাশ্রয়ী সমাস বলে। যেমন —বসে-আঁকো প্রতিযোগিতা, সব পেয়েছির দেশ, নবজলধরপটল সংযোগ, কোণছেঁড়া মলাটওয়ালা, বেশ-একটু রোগা গোছের, দশের ইচ্ছা-বোঝাই করা জীবনখানা, সবুজবাঁচাও কমিটি।



১. ঠিক উত্তরটি বেছে নিয়ে লেখো :

১.১ অর্থের দিক থেকে সম্বন্ধযুক্ত দুই বা তার বেশি পদকে অথবা একটি উপসর্গ ও একটি পদকে একপদে পরিণত করার নাম

(ক) সম্বন্ধি (খ) কারক (গ) সমাস (ঘ) বাচ্য।

১.২ যেসব পদের সমাস হয় তাদের প্রত্যেকটিকে বলা হয়

(ক) সমস্তপদ (খ) সমস্যমান পদ (গ) নামপদ (ঘ) উত্তরপদ

১.৩ সম্বন্ধ দ্বারা গঠিত সমাসবন্ধ পদের একটি উদাহরণ হলো —

(ক) ছাতামাথায় (খ) খেচর (গ) গ্রামান্তর (ঘ) শীতোষ্ম

১.৪ প্রতিটি সমস্যমান পদের অর্থ যে সমাসে প্রধানভাবে বোঝায় তাকে বলা হয়

(ক) দ্বিগুসমাস (খ) দ্বন্দ্বসমাস (গ) কর্মধারয় সমাস (ঘ) তৎপুরুষ সমাস।

১.৫ যে সমাসের ব্যাসবাক্যে পূর্বপদের সঙ্গে কারক বা অ-কারক বিভক্তি বা বিভক্তিসহ অনুসর্গ থাকে, কিন্তু সমাসবন্ধ পদে সেই বিভক্তি বা অনুসর্গ লোপ পায় এবং পরপদের অর্থ প্রাধান্য পায়, তাকে বলা হয়—

(ক) কর্মধারয় সমাস (খ) তৎপুরুষ সমাস (গ) বহুব্রীহি সমাস (ঘ) বাক্যাশ্রয়ী সমাস।

১.৬ ‘শূন্য’ বিভক্তিযুক্ত দুটি বিশেষ্য বা দুটি বিশেষণ পদ দিয়ে অথবা ‘শূন্য’ বিভক্তিযুক্ত একটি বিশেষ্যপদ ও একটি বিশেষণ পদের সহযোগে যে সমাসের সমস্তপদ তৈরি হয় এবং পরপদের অর্থ প্রাধান্য পায়, তাকে বলা হয়

(ক) কর্মধারয় সমাস (খ) অলোপ সমাস (গ) বহুব্রীহি সমাস (ঘ) দ্বন্দ্ব সমাস

১.৭ দ্বিগু সমাসে পূর্বপদটি

(ক) একটি বাক্যাংশ, যা বিশেষ্য বা বিশেষণ হিসেবে ব্যবহৃত হয়।

(খ) সংখ্যা বিশেষণ

(গ) সাধারণ বিশেষ্য

(ঘ) অব্যয়।

১.৮ দ্বি (দুই) গো (গোরু)-এর বিনিময়ে ক্রীত — এটি হলো

(ক) সমাহার দ্বিগুর উদাহরণ

(খ) তদ্ভিতার্থক দ্বিগুর উদাহরণ

(গ) অব্যয়ীভাব সমাসের উদাহরণ

(ঘ) নিত্য সমাসের উদাহরণ

১.৯ নিত্য সমাসে

(ক) সমস্যমান পদগুলি সমাসবন্ধ হওয়ার পরেও পূর্বপদের বিভক্তির লোপ হয় না।

(খ) ব্যাসবাক্য হয় না কিংবা ব্যাসবাক্য করতে হলে সমার্থক অন্য পদের প্রয়োজন হয়।

(গ) একটি বাক্যাংশকে বিশেষ্য বা বিশেষণ হিসেবে প্রয়োগ করা হয়।

(ঘ) পূর্বপদ ও পরপদ যথাক্রমে বিশেষণ ও বিশেষ্য হয় এবং উভয় পদে একই বিভক্তি (শূন্য বিভক্তি) থাকে।

১.১০ রোদে যা পোড়া > রোদেপোড়া। — এটি হলো

(ক) অলোপ তৎপুরুষের উদাহরণ

(খ) অলোপ দ্বন্দের উদাহরণ

(গ) অলোপ বহুব্রীহির উদাহরণ

(ঘ) অলোপ উপপদ তৎপুরুষের উদাহরণ

২. নীচের প্রশ্নগুলির উত্তর নিজের ভাষায় লেখো :

২.১ সন্ধি ও সমাসের একটি পার্থক্য লেখো।

২.২ ভাষার কোন প্রক্রিয়াকে ব্যাকরণে ‘সমাস’ বলা হয়?

২.৩ ‘সমাস’ শব্দটির সাধারণ অর্থ লেখো।

২.৪ নীচের প্রতিক্ষেত্রে সংজ্ঞা নির্দেশ করো :

২.৪.১ সমস্তপদ ২.৪.২ সমস্যমান পদ ২.৪.৩ ব্যাসবাক্য ২.৪.৪ পূর্বপদ ২.৪.৫ উত্তরপদ

২.৫ ‘দ্বিগু’ শব্দের আক্ষরিক অর্থটি কী?

২.৬ উপমিত কর্মধারয় এবং উপমান কর্মধারায় সমাসের একটি পার্থক্য লেখো।

২.৭ রূপক কর্মধারয় সমাস বলতে কী বোঝ?

২.৮ বাক্যাশ্রয়ী ও একশেষ দ্বন্দ্ব সমাসের মধ্যে পার্থক্য কোথায়?

২.৯ একটি উদাহরণের সাহায্যে নিত্য সমাসের বিষয়টি বুঝিয়ে দাও।

২.১০ সংখ্যাবহুব্রীহি ও দ্বিগু সমাসের পার্থক্য কী?

৩. উদাহরণ দাও :

সমাসের নাম	ব্যাসবাক্য	সমস্ত পদ
বিশেষ্য পদের সঙ্গে বিশেষ্য পদের দ্বন্দ্ব		
একশেষ দ্বন্দ্ব		
অপাদান তৎপুরুষ		
উপসর্গ তৎপুরুষ		
না-বহুব্রীহি		
সংখ্যা বহুব্রীহি		
সমাহার দ্বিগু		
রূপক কর্মধারয়		
বাক্যাশ্রয়ী সমাস		
অলোপ বহুব্রীহি		



‘রূপকথায় বলে, এক যে ছিল রাজা, তার দুই রানি — সুয়োরানি আর দুয়োরানি, তেমনি বাংলা বাক্যাধীপেরও আছে দুই রানি; একটাকে আদর করে নাম দেওয়া হয়েছে সাধুভাষা, আর একটাকে কথ্যভাষা, কেউ বলে চলতি ভাষা।’ — বাংলা ভাষার দুই রূপ সম্পর্কে আলোচনা করতে গিয়ে এ কথা লিখেছিলেন রবীন্দ্রনাথ ঠাকুর। পৃথিবীর প্রায় সব দেশেই সমস্ত উন্নত ভাষার এইদুটি রূপ দেখতে পাওয়া যায়। উনিশ শতকে সংস্কৃত ভাষায় শিক্ষিত বাঙালি পণ্ডিতেরা বাংলা গদ্য রচনার প্রয়োজনে সংস্কৃত শব্দবহুল এবং সংস্কৃত ব্যাকরণ অভিধান নির্ভর যে কৃত্রিম পাণ্ডিত্যপূর্ণ ভাষার সৃষ্টি করেছিলেন, তাকেই আমরা সাধুরীতি বলি। কয়েকটি উদাহরণের সাহায্যে বিষয়টি স্পষ্ট করা যায় —

১. এই গিরির শিখর দেশ আকাশপথে সতত সঞ্চারমাণ জলধর-মণ্ডলীরযোগে নিরন্তর নিবিড় নীলিমায় অলংকৃত, অধিত্যকা প্রদেশ ঘনসন্নিবিষ্ট বনপাদপ সমূহে সমাচ্ছন্ন থাকাতে সতত স্নিগ্ধ, শীতল ও রমণীয়, পাদদেশে প্রসন্নসলিলা গোদাবরী তরঙ্গা বিস্তার করিয়া প্রবলবেগে গমন করিতেছে। — (সীতার বনবাস/ঈশ্বরচন্দ্র বিদ্যাসাগর)
২. এই বলিয়া, আরব সেনাপতি, সাদর সম্ভাষণ ও করমর্দন পূর্বক, তাঁহাকে বিদায় দিলেন। তিনি তৎক্ষণাৎ প্রস্থান করিলেন। আরবসেনাপতিও, সূর্যোদয়দর্শনমাত্র, অশ্বে আরোহণ করিয়া, তদীয় অনুসরণে প্রবৃত্ত হইলেন। — (অদ্ভুত আতিথেয়তা/ঈশ্বরচন্দ্র বিদ্যাসাগর)
৩. যদি কালধর্মে প্রদোষকালে প্রবল ঝটিকা বৃষ্টি আরম্ভ হয় তবে সেই প্রান্তরে, নিরাশ্রয়ে যৎপরোনাস্তি পীড়িত হইতে হইবে। প্রান্তর পার হইতে না হইতেই সূর্যাস্ত হইল, ক্রমে নৈশ গগন নীল নীরদমালায় আবৃত হইতে লাগিল, নিশারঙেই এমন ঘোরতর অশ্বকার দিগন্ত-সংস্থিত হইল যে, অশ্বচালনা অতি কঠিন বোধ হইতে লাগিল। (দুর্গেশনন্দিনী / বঙ্কিমচন্দ্র চট্টোপাধ্যায়)

৪. অকপটে মানুষ যদি মানুষকে ভালোবাসে, তবে তাহা বৃথা যায় না। পৃথিবীর বড়োলোকদের এই প্রকৃতি দেখি, তাঁহারা ভালোবাসাতেও বড়ো। তাঁহারা যেমন মানুষকে অকপটে ভালোবাসিতে পারিয়াছেন, এমন সাধারণ লোকে পারে না। (ভালোবাসা কি বৃথা যায়?/ শিবনাথ শাস্ত্রী)
৫. রমেশ আর শূনিবার জন্য অপেক্ষা করিল না, দ্রুত পদে প্রস্থান করিল। এ বাড়িতে আসিয়া যখন প্রবেশ করিল, তখন সন্ধ্যা হয় হয়। বেণী তাকিয়া ঠেস দিয়া তামাক খাইতেছে এবং কাছে হালদার মহাশয় বসিয়া আছেন; বোধ করি এই কথাই হইতেছিল। (পল্লীসমাজ/শরৎচন্দ্র চট্টোপাধ্যায়)

— এবার এই উদাহরণগুলির নিরিখে সাধু রীতির বৈশিষ্ট্যগুলি নির্ধারণ করা যাক।

- তৎসম এবং অপ্রচলিত শব্দ ব্যবহারের প্রাবল্য। যেমন : সঙ্করমান, তরঙ্গা, প্রদোষকালে, অশ্বচালনা প্রভৃতি।
- এই রীতিতে বাক্য গঠন সবসময়ই নির্দিষ্ট নিয়ম মেনে চলে।
- ভাষার সাধু রূপে সমাসবন্ধ পদ ব্যবহারের আধিক্য লক্ষ করা যায়। যেমন : বনপাদপ, প্রসন্নসলিলা, নিরন্তর প্রভৃতি।
- সাধু রীতিতে সর্বনাম এবং ক্রিয়াপদের পূর্ণ রূপ ব্যবহৃত হয়। যেমন : তাঁহাকে, তাঁহারা, তদীয় প্রভৃতি, আর করিতেছে, হইতে হইবে, পারিয়াছেন ইত্যাদি।
- সাধু রীতিতে শব্দালংকার ও অর্থালংকার-এর প্রয়োগ বাহুল্য দেখা যায়।

অন্যদিকে বাংলা ভাষার যে রূপটি কলকাতার শিক্ষিত জনগণের মৌখিক শিষ্ট ভাষার উপর ভিত্তি করে সাহিত্য রচনার উপযোগী আদর্শ ভাষা হিসেবে স্বীকৃতি পেয়েছে, তাকেই আমরা মান্য চলিত বাংলা (Standard Colloquial Bengali) বলে থাকি। যদিও এই মান্য চলিত রীতির সঙ্গে প্রচলিত মুখের ভাষার তফাত আছে। পুরুলিয়া-বাঁকুড়ার বাংলার চলিত রূপ উত্তর বঙ্গের বাংলা ভাষার চলিত রূপ এক নয়। এর অঞ্চলভেদে মৌখিক চলিত বাংলার বহু রূপভেদ আছে। তাই সেই থেকে ক্রমে চলিত বাংলা বলতে কলকাতা, নবদ্বীপ, শান্তিপুর অর্থাৎ ভাগীরথী তীরস্থ অঞ্চলের বাংলা ভাষার শিষ্ট চলিত রূপটিই মান্য চলিত বাংলার মর্যাদা পেয়েছে। কয়েকটি উদাহরণ দেওয়া যাক —

১. আমাদের জাহাজে একটি পার্সি সহযাত্রী আছে। তার ছুঁচোলো ছাঁটা দাড়ি এবং বড়ো বড়ো চোখ সর্বপ্রথমেই চোখে পড়ে। অল্প বয়স। নয় মাস যুরোপে বেড়িয়ে বিলিতি পোশাক এবং চালচলন ধরেছে। বলে, ইন্ডিয়া লাইক করে না। (যুরোপ-যাত্রীর ডায়ারি/রবীন্দ্রনাথ ঠাকুর)

২. নাটোর তো পৌঁছানো গেল। এলাহি ব্যাপার সব। কী সুন্দর সাজিয়েছে বাড়ি, বৈঠকখানা। ঝাড়লগুন, তাকিয়া, ভালো ভালো দামি ফুলদানি, কার্পেট, সে সবে তুলনা নেই—যেন ইন্দ্রপুরী। কী আন্তরিক, আদরযত্ন, কী সমারোহ, কী তার সব ব্যবস্থা। একেই বলে রাজসমাদর। (নাটোরের কথা/অবনীন্দ্রনাথ ঠাকুর)
 ৩. ব্যাপারটা খুব সম্ভবত ১৯২৮ সালে শীতকালে ঘটেছিল — বছর আর তারিখটা ঠিক-মতন মনে পড়ছে না। স্বশুরালয় গয়া থেকে ফিরছি। দেহরা-দুন এক্সপ্রেস ধরব। সঙ্গে একখানি মধ্যম শ্রেণির রিটার্ন টিকিটের ফিরতি অংশ আছে। (পথচলতি/সুনীতিকুমার চট্টোপাধ্যায়)
 ৪. আজ সকালে ঘুম থেকে উঠে দেখি যে, যদিকে যতদূর দৃষ্টি যায় সমগ্র আকাশ বর্ষায় ভরে গিয়েছে। মাথার উপর থেকে অবিরাম অবিরল অবিচ্ছিন্ন বৃষ্টির ধারা পড়ছে। সে ধারা এত সূক্ষ্ম নয় যে চোখ এড়িয়ে যায়, অথচ এত স্থূলও নয় যে তা চোখ জুড়ে থাকে। (বর্ষা/প্রমথ চৌধুরী)
 ৫. কথা বলার ভঙ্গিটা মাঝির ভালো ঠেকল না। সম্ভব-অসম্ভব নানারকম ভেবে সে মনে মনে দূত হয়ে উঠল। — যামু নাকি এই আন্দাইরা গলির ভিতরে পইড়া থাকুম নাকি? (আদাব/সমরেশ বসু)
- এবার উদাহরণগুলির নিরিখে চলিত বাংলার বৈশিষ্ট্যগুলি নির্ণয় করা যাক —

- চলিত রীতিতে অর্থতৎসম, তদ্ভব, দেশি এবং বিদেশি শব্দের প্রয়োগ অনেক বেশি।
- সমাসবন্ধ পদের ব্যবহার এই রীতিতে অনেক কম। পরিবর্তে বাগধারা কিংবা প্রচলিত বাক্য বিন্যাসের প্রয়োগ বাহুল্য দেখা যায়।
- সর্বনাম এবং ক্রিয়াপদের সংক্ষিপ্ত রূপ চলিত বাংলায় ব্যবহৃত হয়।
- অনুসর্গের ভিন্নরূপ চলিত বাংলায় প্রচলিত। যেমন : সাধুরূপে : দ্বারা, হইতে, সহিত প্রভৃতি, চলিত রূপে : দিয়ে, হতে, সঙ্গে ইত্যাদি।
- সাধু রীতিতে বাক্যবিন্যাসের যে নির্দিষ্ট নিয়ম রয়েছে, তা চলিত রীতিতে অনেকটাই শিথিল এবং প্রায়ই তা পরিবর্তিত হয়। রবীন্দ্রনাথ দেখিয়েছিলেন —

কোথায় গেলেন তোমার দাদা?

তোমার দাদা কোথায় গেলেন?

দাদা তোমার গেলেন কোথায়? ইত্যাদি।

সুতরাং সাধু ও চলিত রীতির আলোচনার পরিপ্রেক্ষিতে, এদের মৌলিক পার্থক্য নির্ধারণ করতে গিয়ে বলা যায় —

সাধু রীতি	চলিত রীতি
সর্বনামের পূর্ণাঙ্গ রূপ ব্যবহৃত হয়। যেমন : তাহাদের, কাহাকেও, যাহাদিগের ইত্যাদি।	সর্বনামের প্রচলিত সংক্ষিপ্ত রূপ ব্যবহৃত হয়। যেমন : তাদের, কাউকে, যাদের প্রভৃতি।
ক্রিয়াপদের সম্পূর্ণ ও সুনির্দিষ্ট রূপগুলি প্রয়োগ করা হয়। যেমন : করিতেছে, বলিতেছিলেন, আইস, উঠিয়া প্রভৃতি।	ক্রিয়াপদের সংক্ষিপ্ত ও একাধিক রূপ ব্যবহৃত হয়। যেমন : করছে, বলছিলেন, এসো, উঠে > ওঠে ইত্যাদি।
অনুসর্গের রূপগুলি চলিত রূপের থেকে পৃথক। যেমন : হইয়া, চাইতে প্রভৃতি।	অনুসর্গের রূপগুলি সাধু রূপের থেকে ভিন্ন। যেমন : হয়ে, চেয়ে, দিয়ে, থেকে ইত্যাদি।
বাক্যবিন্যাসরীতি অনমনীয় ও সুনির্দিষ্ট।	বাক্যবিন্যাস রীতি অনেক নমনীয় এবং ক্রিয়াটি বাক্যের ভেতরে চলে আসায় ভাষার গতি বৃদ্ধি পায়।

তাই সাধু থেকে চলিত কিংবা চলিত থেকে সাধু রীতিতে রূপান্তরের সময়, উভয় রীতির এই মৌলিক বিশেষত্বগুলি খেয়াল রেখে রূপান্তর করতে হয়। কয়েকটি দৃষ্টান্ত :

সাধু থেকে চলিত

- জ্যোতিদাদার উদ্যোগে আমাদের একটি সভা হইয়াছিল, বৃন্দ রাজনারায়ণবাবু ছিলেন তাহার সভাপতি। ইহা স্বাদেশিকতার সভা। কলিকাতার এক গলির মধ্যে এক পোড়ো বাড়িতে সেই সভা বসিত।
(চলিত রীতি) জ্যোতিদাদার উদ্যোগে আমাদের একটি সভা হয়েছিল, বৃন্দ রাজনারায়ণবাবু ছিলেন তার সভাপতি। এ স্বাদেশিকতার সভা। কলিকাতার এক গলির মধ্যে এক পোড়ো বাড়িতে সেই সভা বসত।
- কিন্তু আমি আপনাকে যে অশ্ব দিয়াছি, উহা আমার অশ্ব অপেক্ষা কোনো অংশেই হীন নহে; যদি উহা দ্রুতবেগে গমন করিতে পারে, তাহা হইলে আমাদের উভয়ের প্রাণরক্ষার সম্ভাবনা।
(চলিত রীতি) কিন্তু আমি আপনাকে যে ঘোড়া দিয়েছি, তা আমার ঘোড়ার থেকে কোনো অংশেই খারাপ নয়; যদি ও জোরে যেতে পারে, তা হলে আমাদের দুজনের প্রাণে বাঁচার সম্ভাবনা।
- তোমরা শুল্ক গাছের ডাল সকলেই দেখিয়াছ। মনে করো, কোনো গাছের তলাতে বসিয়াছ। ঘন সবুজ পাতায় গাছটি ঢাকা, ছায়াতে তুমি বসিয়াছ। গাছের নীচে এক পার্শ্বে একখানি শুল্ক ডাল পড়িয়া আছে।

(চলিত রীতি) তোমরা শুল্ক গাছের ডাল সকলেই দেখেছ। মনে করো, কোনো গাছের তলাতে বসেছ। ঘন সবুজ পাতায় গাছটি ঢাকা, ছায়াতে তুমি বসেছ। গাছের নীচে এক পাশে একখানি শুল্ক ডাল পড়ে আছে।

চলিত থেকে সাধু

- তাকিয়ে দেখল — অনেকটা দূরে একজন অশ্বারোহী এদিকেই আসছে। ভাববার সময় নেই। বাঁ-পাশে মেথর যাতায়াতের সরু গলির মধ্যে আত্মগোপন করল তারা।
(সাধু রীতি) তাকইয়া দেখিল — অনেকটা দূর হইতে একজন অশ্বারোহী এদিকেই আসিতেছে। ভাবিবার সময় নাই। তাহারা বাম পাশের মেথর যাতায়াতের সরু গলির মধ্যে আত্মগোপন করিল।
- অভিধান-জাতীয় গ্রন্থের গুণাগুণ বিচারের ক্ষমতা আমার নেই। এ বিষয়ে বিশেষজ্ঞরাই মতামত দেবার অধিকারী। কোনো কোনো বিশেষজ্ঞের মুখে শুনেছি অভিধানে কিছু কিছু ঘাটতি আছে। এখন বড়ো ব্যাপারে—বিশেষ করে এবার চেষ্টায়— কিছু ভুলভ্রান্তি থাকা অসম্ভব নয়।
(সাধু রীতি) অভিধান-জাতীয় গ্রন্থের গুণাগুণ বিচার করিবার ক্ষমতা আমার নাই। এ বিষয়ে বিশেষজ্ঞরাই মতামত দিবার অধিকারী। কোনো কোনো বিশেষজ্ঞের মুখ হইতে শুনিয়াছি অভিধানে কিছু কিছু ঘাটতি আছে। এরূপ বৃহৎ ব্যাপারে—বিশেষ করিয়া একক চেষ্টায়— কিছু ত্রুটি-বিচ্যুতি থাকা অসম্ভব নহে।
- তাহলে কী হবে বলবার দরকার ছিল না। কাল রবিবার — ভোরের গাড়িতেই আমরা বেরুব পিকনিকে। আজকের মধ্যেই রাজহাঁসের ডিম জোগাড় করতে না পারলে তো গেছি।
(সাধু রীতি) তাহা হইলে কী হইবে বলিবার দরকার ছিল না। কাল রবিবার — ভোরের গাড়িতেই আমরা পিকনিকে বাহির হইব। আজিকার মধ্যে রাজহাঁসের ডিম জোগাড় করিতে না পারিলেই তো গিয়াছি।



১. ঠিক বিকল্পটি বেছে নিয়ে বাক্যটি আবার লেখো :

১.১ ‘আপনাদিগের’-এর চলিত ভাষার রূপটি হলো—

(ক) আপনার (খ) আপনি (গ) আমাদের (ঘ) আপনাদের

১.২ ‘ওদেরকে’-এর সাধু ভাষার রূপটি হলো—

(ক) তাহাদের (খ) তাহাদিগের (গ) উহাদিগকে (ঘ) উহার

১.৩ সাধু ভাষার একটি প্রধান বৈশিষ্ট্য হলো—

(ক) ক্রিয়ার সংক্ষিপ্ত রূপ (খ) সমাসবন্ধ পদের প্রয়োগ বাহুল্য

(গ) সর্বনামের সংক্ষিপ্ত রূপ (ঘ) অনুসর্গের আধিক্য

১.৪ চলিত ভাষায় দেখতে পাওয়া যায়—

(ক) সমাসবন্ধ পদ (খ) ক্রিয়ার সংক্ষিপ্ত রূপ

(গ) শব্দালংকারের প্রয়োগ বাহুল্য (ঘ) তৎসম শব্দের আধিক্য

১.৫ নীচের কোন বাক্যটি ব্যাকরণগত ভাবে ভুল—

- (ক) আপনি আসুন। (খ) কোথায় যাওয়া হইতেছে? (গ) এখন অন্ধকার হইয়া এসেছে।
(ঘ) তোমার নাম লেখো।

২. নির্দেশ অনুযায়ী নীচের প্রশ্নগুলির উত্তর দাও :

- ২.১ বাংলা ভাষার লিখিত কয়টি রূপ দেখতে পাওয়া যায় ও কী কী?
২.২ পাঠ্যবই থেকে একটি সাধু রীতির দৃষ্টান্তবাক্য খুঁজে নিয়ে লেখো।
২.৩ পাঠ্যবই থেকে একটি চলিত রীতির দৃষ্টান্তবাক্য খুঁজে নিয়ে লেখো।
২.৪ সাধু ও চলিত রীতির একটি করে বৈশিষ্ট্য লেখো।
২.৫ সাধু ও চলিত রীতির একটি মৌলিক প্রভেদ কী?
২.৬ ‘ছোটোদের পথের পাঁচালী’ কোন রীতিতে লেখা উপন্যাস।
২.৭ সাধু থেকে চলিত ভাষায় রূপান্তর করো : ‘একদা আরব জাতির সহিত মুরদিগের সংগ্রাম হইয়াছিল।’
২.৮ সাধু থেকে চলিত ভাষায় রূপান্তর করো : ‘আরবেরা তাঁহার অনুসরণে বিরত হইলে, তিনি স্বপক্ষীয় শিবিরের উদ্দেশে গমন করিতে লাগিলেন।’
২.৯ সাধু থেকে চলিত ভাষায় রূপান্তর করো : ‘বৎসরে দুশো টাকার মাছ বিক্রি হয় বলিয়া জমিদার বেণীবাবু তাহা কড়া পাহারায় আটকাইয়া রাখিয়াছেন।’
২.১০ সাধু থেকে চলিত ভাষায় রূপান্তর করো : ‘ধুতিটা কর্মক্ষেত্রের উপযোগী নহে অথচ পায়জামাটা বিজাতীয়, এইজন্য তিনি এমন একটা আপোস করিবার চেষ্টা করিলেন যেটাতে ধুতিও ক্ষুণ্ণ হইল, পায়জামাও প্রসন্ন হইল না।’
২.১১ সাধু থেকে চলিত ভাষায় রূপান্তর করো : ‘হেয়ার হিন্দু স্কুলের ছোটো ছোটো ছেলেদের এত ভালোবাসিতেন যে, একটার সময় টিফিনের ছুটি হইলে হেয়ারের আর অন্য কাজ থাকিত না; তিনি দৌড়াইয়া আসিয়া একদৃষ্টে দাঁড়াইয়া ছেলেদের খেলা দেখিতেন।’
২.১২ চলিত থেকে সাধু ভাষায় রূপান্তর করো : ‘আমি যখন ধীরভাবে চিন্তা করি, তখন আমার নিঃসংশয় ধারণা জন্মে যে, আমাদের সমস্ত দুঃখকষ্টের অন্তরে একটা মহত্তর উদ্দেশ্য কাজ করছে।’
২.১৩ চলিত থেকে সাধু ভাষায় রূপান্তর করো : ‘তিনি তৎক্ষণাৎ নম্রহৃদয়ে নতমস্তকে কবির আদেশ শিরোধার্য করে নিলেন।’
২.১৪ চলিত থেকে সাধু ভাষায় রূপান্তর করো : ‘স্বপনদার কথা শুনে রঞ্জনের মনের মধ্যে চেপে রাখা রাগটা আবার মাথা চাড়া দিয়ে উঠল।’



প্রথম অধ্যায়

বাংলা প্রবাদ

সাধারণ ধারণা

পৃথিবীর প্রায় সমস্ত ভাষাতেই প্রবাদের প্রচলন আছে। প্রবাদগুলি প্রধানত সুপ্রাচীন মৌখিক পরম্পরার চিহ্ন বহন করে। সুপ্রাচীন পরম্পরা বলেই প্রবাদগুলির কোনো নির্দিষ্ট উৎসকাল চিহ্নিত করা যায় না, কোনো ব্যক্তিবিশেষের নামও প্রবাদমালার সঙ্গে যুক্ত নয়। বলা যেতে পারে ‘ছড়া’-র মতোই প্রবাদও সাবেককালের জনগোষ্ঠী বা জনমানসের হাতে সৃষ্টি হয়েছে। প্রবাদ-এর আকার সাধারণত এক বা দুই পঙ্ক্তির মধ্যে সীমাবদ্ধ। ঐ সীমিত উচ্চারণে বা অভিব্যক্তিতে জীবন অভিজ্ঞতা এবং জীবন মূল্যায়নের এমন দীপ্তি পরিস্ফুট হয়ে ওঠে যে, সেটি ঐ ভাষার স্থায়ী সম্পদ হিসেবে গৃহীত হয়। একভাবে বলা চলে, প্রবাদ হলো প্রকৃষ্ট লোকবাদ। বাংলা ভাষায় প্রচলিত প্রবাদগুলির মধ্যে প্রাজ্ঞদৃষ্টির অসামান্য প্রকাশ সহজেই লক্ষ করা যায়। প্রবাদগুলি একদিকে সর্বজনীনতা লাভ করেছে, অন্যদিকে তার মধ্যে সঞ্চিত রয়েছে বহুযুগের বাঙালি সংস্কৃতির নানা খুঁটিনাটি। স্থানিক পরিবেশ, লোকাচার, জীবনদৃষ্টি, মূল্যবোধ বা সংস্কার-বিচার প্রবাদগুলির প্রধান ভিত্তি। যুগ বদলালেও এই অভিব্যক্তিগুলির কোনো পরিবর্তন ঘটে না। ‘নাচতে না জানলে উঠোন বাঁকা’ কখনোই পরিবর্তিত দেশকালে ‘নাচতে না জানলে স্টেজ বাঁকা’-য় রূপান্তরিত হতে পারে না।

প্রবাদের মূল্য

প্রবাদগুলি কোনো একক ব্যক্তির নয়, গোষ্ঠীজীবনের সম্মিলিত সৃষ্টি। অনেক পণ্ডিত মনে করেন, প্রবাদগুলির মূল স্রষ্টা বাংলার নারীসমাজ। এই অনুমানের কারণ, প্রবাদগুলিতে অন্তঃপুরের যে বিশেষ অভিজ্ঞতা বা আটপৌরে জীবনের অনুপুঙ্খ বর্ণনা রয়েছে সেগুলি নারীজীবনের ঘরকন্নার সঙ্গেই ওতপ্রোত জড়িত। নারী বা পুরুষ যার সৃষ্টিই হোক, প্রবাদগুলিতে সহজভাষায় দার্শনিকতার যে চর্চা লক্ষ করা যায়, তাকে যথাযোগ্য প্রশংসা করতেই হবে। প্রধানত দুটি স্তরে প্রবাদ ক্রিয়াশীল হয়। প্রথমটি তার অভিধার্থ। দ্বিতীয়স্তরে সেই অভিধার্থকে অতিক্রম করে প্রবাদ কোনো চিরন্তন জীবনসত্যকে প্রতিভাত করে। গবেষকদের মতে, প্রবাদে লোকোক্তি যেমন প্রাজ্ঞের চিন্তায় প্রবেশ করেছে, প্রাজ্ঞোক্তিও কোনো ব্যক্তির মাধ্যমে সমবেত জীবনে, দৈনন্দিন ভাষায় বিস্তার লাভ করেছে।


প্রবাদগুলি একদিকে যেমন বাস্তবের নির্ভরযোগ্য প্রতিবিন্দু, অন্যদিকে দার্শনিক ভাবগভীরতায় সমধিক স্মরণীয়। পরবর্তীযুগে বহু কবি, সাহিত্যিক, সংগীতকারের রচনাতেও এমন অনেক প্রাজ্ঞোক্তির সন্ধান মেলে যাকে ‘প্রবাদ’ হিসেবে গ্রহণ করা হয়। এ প্রসঙ্গে ভারতচন্দ্র, ভোলা ময়রা, বঙ্কিমচন্দ্র, রবীন্দ্রনাথ ঠাকুর, মুকুন্দদাস, নজরুল ইসলাম, অতুলপ্রসাদ সেন প্রমুখের নাম উল্লেখযোগ্য।

প্রবাদের নমুনা

- ১। তাল ঘষলে গন্ধ মিঠা, নেবু ঘষলে হয় তিতা।
(ক্ষেত্র অনুযায়ী ফল লাভ।)
- ২। শূন্য কলশির আওয়াজ বেশি।
(সারবস্তুহীন ব্যক্তির আত্মগালন।)
- ৩। নুন আনতে পান্তা ফুরোয়।
(দারিদ্র্যের অসহ্য অবস্থা।)
- ৪। অধিক সন্ধ্যাসীতে গাজন নষ্ট।
(অধিক লোকের সমাগমে কার্য নষ্ট।)
- ৫। যার কর্ম তারে সাজে, অন্যলোকে লাঠি বাজে।
(যে কাজে যে অভ্যস্ত, তার পক্ষেই সেই কাজ করা সহজ।)
- ৬। যার ধন তার ধন নয়, নেপোয় মারে দই।
(অযোগ্য লোক ধনবানের অর্থ আত্মসাৎ করে।)
- ৭। গেঁয়ো যোগী ভিখ পায় না।
(অতি ঘনিষ্ঠজনের গুণের কদর হয় না।)
- ৮। রাজায় রাজায় যুদ্ধ হয়, উলুখাগড়ার প্রাণ যায়।
(প্রতাপশালীদের সংঘর্ষে সাধারণের জীবন ধ্বংস হয়।)
- ৯। কাজের বেলায় কাজি, কাজ ফুরোলে পাজি।
(কাজ করিয়ে পারিশ্রমিক থেকে বঞ্চিত করা এবং দুর্নাম করা।)
- ১০। দুষ্ট গোরুর চেয়ে শূন্য গোয়াল ভালো।
(খল ব্যক্তির বন্ধুত্বের থেকে বন্ধুহীন থাকা শ্রেয়।)
- ১১। পিপীলিকার পাখা ওঠে মরিবার তরে।
(পতনের পূর্বে মাত্রাধিক সক্রিয়তা।)
- ১২। ঘরে নেই ভাত, কোঁচা তিন-হাত।
(বাহ্যিক বাবুয়ানির সমালোচনা।)

- ১৩। কাজের মধ্যে দুই
খাই আর শুই।
(আলস্যময় জীবনচর্চার প্রতি ব্যঙ্গ।)
- ১৪। থোড় বড়ি খাড়া, খাড়া বড়ি থোড়।
(একঘেয়ে পুনরাবৃত্তি)
- ১৫। তাদের সম্পর্ক আদায়-কাঁচকলায়।
(সম্পূর্ণ বিরোধী)
- ১৬। ঘর পোড়া গোরু সিঁদুরে মেঘ দেখলে ভয় পায়।
(পূর্বঅভিজ্ঞতার নিরিখে আশঙ্কা করা।)
- ১৭। হেলে ধরতে পারে না
কেউটে ধরতে যায়।
(যোগ্যতার সীমা না বুঝে কাজ করার চেষ্টা।)
- ১৮। মারি তো গন্ডার, লুটি তো ভাঙার।
(বড়ো কর্মকাণ্ডের পরিকল্পনা করা)
- ১৯। বাজারে আগুন লাগলে পিরের ঘর মানে না।
(দুঃসময় কোনো সৎ-অসৎ মানুষের মধ্যে ভেদাভেদ করে না।)
- ২০। এক হাতে তালি বাজে না।
(দুপক্ষের দোষ থেকেই বিবাদ হয়।)

* উপরের প্রবাদগুলিকে বাক্যে সার্থকভাবে ব্যবহার করো।



দ্বিতীয় অধ্যায়

এক শব্দের

একাধিক অর্থে প্রয়োগ

বাংলা ভাষার একটি মজার বৈশিষ্ট্য আছে, একই শব্দের একাধিক অর্থে প্রয়োগ আমাদের ভাষার একটি মৌখিক রীতি। একই শব্দ আলাদা আলাদা বাক্যে ব্যবহৃত হয়ে সম্পূর্ণ ভিন্ন অর্থ ও ভাব প্রকাশ করে। এই অধ্যায়ে উদাহরণ সহযোগে সেই বিষয়টিই সংক্ষেপে আলোচনা করা হলো।

ভিন্ন অর্থে ব্যবহৃত একই শব্দগুলি বিশেষ্য, বিশেষণ এবং ক্রিয়ার শ্রেণিবিভাগের অন্তর্ভুক্ত। এই আলোচনায় চোখ, মাথা, হাত, বুক এই চারটি বিশেষ্য পদ; পাকা, কাঁচা, বড়ো, ছোটো এই চারটি বিশেষণ পদ এবং কাটা, বসা এই দুটি ক্রিয়াকে আলাদা আলাদা বাক্যে ব্যবহার করে দেখানো হলো কীভাবে একই শব্দ একাধিক অর্থে ব্যবহৃত হয়ে ভিন্ন ভাব প্রকাশ করে এবং ভাষার সৌন্দর্য ও পরিধি বিস্তারে সহায়তা করে।

বিশেষ্য :

চোখ

১. প্রথমে লোকটির স্বরূপ বুঝতেই পারিনি, পরে তোমার কথায় আমার চোখ ফুটল (প্রকৃত জ্ঞান লাভ করা)।
২. দিদিভাই আমাকে চোখে আঙুল দিয়ে দেখিয়ে (প্রমাণসহ বোঝানো) দিল যে দোকানের দাড়িপাল্লাটি গোলমেলে।
৩. গাছের তলা দিয়ে যেতে যেতে মাথায় ডাব পড়ে যাওয়ায় চোখে সর্ষেফুল দেখলাম (দিশাহারা অবস্থা)।
৪. বাচ্চকে চোখে চোখে রেখো যেন পড়ে না যায়। (সতর্ক দৃষ্টি রাখা)
৫. আগাম খবর না দিয়ে সাতসকালে মামাবাড়ি পৌঁছাতে দিদিমার চোখ কপালে উঠল (অতিমাত্রায় বিস্মিত হওয়া)।
৬. রমেশের নতুন বাড়ি তৈরি হচ্ছে দেখে প্রতিবেশীদের চোখ টাটিয়েছে (হিংসা করা)।

৭. রামবাবু বন্যাভাগে মাত্র পাঁচ টাকা চাঁদা দিয়ে প্রমাণ করলেন যে ধনী হলেও তাঁর চোখের চামড়া (লজ্জা) নেই।
৮. পাড়ার রবীন্দ্রজয়ন্তী অনুষ্ঠানে চিত্রাঙ্গদার ভূমিকায় রেশমার অভিনয় ছিল চোখে পড়ার মতো (দ্রষ্টব্য)।
৯. মা মরা ছেলেটি ক্রমশ কাকিমার চোখের বালি (অপছন্দের ব্যক্তি) হয়ে উঠেছিল।
১০. জমিদারের নায়েব চোখ রাঙিয়ে (শাসন করে) দরিদ্র প্রজাদের জানিয়ে দিল যে দ্বিগুণ কর দিতেই হবে।

মাথা

১. সেনাপতির আদেশ মাথা পেতে নিয়ে (শিরোধার্য করা) সৈন্যদল বীরবিক্রমে শত্রুশিবির জয়ের জন্য এগিয়ে গেল।
২. শ্যামবাবু পাড়ার অনুষ্ঠানে বেশি চাঁদা দিয়ে এমন ভাব করছেন যেন তিনি সবার মাথা কিনে নিয়েছেন (প্রভুত্বের ভাব)।
৩. সবার মাঝখানে ছেলের উদ্ভট আচরণ প্রত্যক্ষ করে তাঁর লজ্জায় মাথা কাটা (অপমানিত হওয়া) গেল।
৪. দিদিমা ছোটো নাটিকে অতিরিক্ত আশকারা দিয়ে তার মাথাটি খেয়েছেন (স্বভাব নষ্ট করা)।
৫. রেহান বন্ধুর হাতদুটি জড়িয়ে ধরে বলল, ‘আমার মাথা খা (দিব্যি দেওয়া) কিন্তু ওদের সঙ্গে ঝগড়া করিস না।’
৬. জিনিসপত্রের দাম অতিরিক্ত বেড়ে যাওয়ায় বড়দার পক্ষে এত বড়ো সংসার চালানো মাথা ব্যথার (দুশ্চিন্তা) কারণ হয়ে দাঁড়িয়েছে।
৭. মাত্র দুমাস পরে মাধ্যমিক পরীক্ষা তাই অন্যান্য বিষয়ে মাথা ঘামানো (চিন্তা করা) বন্ধ করো।
৮. প্রবীণ রহিমচাচা গ্রামের মাথা (প্রধান ব্যক্তি) বলে তাঁর কথা সবাই মানে।
৯. ছোটোবেলা থেকেই পড়াশুনায় পিটারের মাথা (বুদ্ধিমত্তা) খুব ভালো বলে সবাই তাকে ভালোবাসে।
১০. অন্যের মাথায় কাঁঠাল ভেঙে (প্রবঞ্চনা করে) বেশিদিন নিজের স্বার্থসিদ্ধি করা যায় না।
১১. বাঁচার রসদ জোগাড় করার জন্য শেরপারা মাথার ঘাম পায়ে ফেলে (কঠোর পরিশ্রম করে)।

হাত

১. ভাগ দেবার লোভ দেখিয়ে অমল ভাইকে হাত করে (বশে আনা) আচারের শিশি চুরি করেছে।
২. দুঃখী মানুষদের সহযোগিতার ক্ষেত্রে তাঁর হাত খোলা (দানশীল) স্বভাবের কথা সবাই জানে।
৩. শরিকি গোলমালের জেরে এই নিয়ে আমাদের পাড়ার জীর্ণ মল্লিকবাড়িটি পাঁচবার হাত বদল (মালিকানা পরিবর্তন) হলো।

৪. আত্মাভিমानी মানুষ শত দুঃখেও অন্যের কাছে হাত পাতে না (সাহায্য চাওয়া)।
৫. ডাক্তারবাবুর হাত যশে (দক্ষতার জন্য খ্যাতি) বিধবার একমাত্র সন্তান এ যাত্রা মৃত্যুমুখ থেকে ফিরে এল।
৬. কাছারিবাড়ির নতুন কর্মচারীটির হাতটানের (চুরির অভ্যাস) কথা কিছুদিনের মধ্যেই জানাজানি হয়ে গেল।
৭. দরিদ্র মানুষগুলিকে সাহায্য করার আন্তরিক ইচ্ছা থাকলেও আইনের দ্বারা আমার হাত বাঁধা (নিরুপায়)
৮. শ্রমিকরা অন্যায়ের বিরুদ্ধে প্রতিবাদ করার ফলে মালিক কারখানা বন্ধ করে তাদের হাতে মারার বদলে ভাতে মারলো (প্রহারের পরিবর্তে কৌশলে আর্থিক ক্ষতিসাধন)।

বুক

১. অসুস্থ ছেলেটি মায়ের বুক (অঙ্গ) মাথা পেতে নিশ্চিন্তে ঘুমিয়ে পড়ল।
২. আর্ত, নিপীড়িত মানুষদের দুর্দশা দেখে স্বামীজির বুক ফেটে (হৃদয় বিদীর্ণ) যায়।
৩. স্বদেশজননীর বুক (অন্তরাত্মা) সন্তানের জন্য রয়েছে স্নেহ, মায়া, মমতা।
৪. কুস্তবীর একাই বুক দিয়ে (প্রাণ দিয়ে) নকল বুঁদিগড় রক্ষা করছে।
৫. ওকে ভয় দেখিও না, ওর ডাকাতির মতো বুক (সাহসী)।
৬. ভারতবর্ষের বুক (মাটিতে) বৈচিত্র্যের মধ্যে ঐক্য গড়ে উঠেছে।
৭. একমাত্র সন্তানের মৃত্যুতে মায়ের বুক শোকে পাথর (স্তম্ভ) হয়ে গেছে।
৮. তোমার জন্য রয়েছে এক বুক (অপর্যাপ্ত) ভালোবাসা।
৯. হাতে হাত আর বুক বুক (সম্প্রীতির ভাব) মিলিয়ে দেশের স্বাধীনতা রক্ষা করব।
১০. এই বিপদের দিনে বড়োভাই হিসেবে তোমাকেই বুক বাঁধিতে (সাহস সঞ্চার) হবে।

বিশেষণ :

পাকা

১. প্রখর তপন তাপে জনজীবন অতিষ্ঠ হলেও পাকা (পক্ক) আম কাঁঠালের স্বাদ জিভে জল এনে দেয়।
২. সাগরদিঘির ধার দিয়ে পাকা (কংক্রিট) রাস্তা ধরে সোজা হাঁটলেই তোমার চরে পৌঁছাবে।
৩. বয়স অল্প হলেও ছেলেটি সব বিষয়েই পাকা পাকা (বয়সোচিত নয় এমন) কথা বলে।
৪. রঞ্জনকাকু উইলিয়মকে জড়িয়ে ধরে পাকা (চুড়ান্ত) কথা দিলেন যে পাঁচিশে ডিসেম্বর একসঙ্গে কেক কাটবেন।

কাঁচা

১. গ্রামের কাঁচা (অস্থায়ী) রাস্তা বর্ষার জলকাদায় পিছল হয়ে আছে।
২. কাঁচা (তরুণ) বয়স বলেই সমস্যার গভীরে প্রবেশ করতে পারছে না।
৩. কাঁচামাল (স্বাভাবিক উৎপন্ন দ্রব্য) আমদানি-রপ্তানির জন্য জাতীয় সড়কটি ব্যবহার করা হয়।
৪. কাঁচা ঘুম (অসম্পূর্ণ) ভেঙে যাওয়ায় কুশ্লকর্ণ বিকট চিৎকার করে উঠল।
৫. ধূর্ত মেজবাবুর সঙ্গে বিবাদ বাধানোর মতো কাঁচা কাজ (ভুল) কোরো না।
৬. এমন কাঁচা লেখা (নিম্নমান) কখনোই সংবাদপত্রে ছাপা হবে না।
৭. কাঁচা খাতায় (খসড়া) আগে হিসাবটা তুলে রাখো, পরে পাকা করবে।

বড়ো

১. বাস্তব পরিস্থিতি না বুঝে বড়ো বড়ো কথা (স্পর্ধিত উক্তি) সবাই বলে।
২. বাড়িতে আজ বড়ো কুটুম (শ্যালক) এসেছে তাই ভালো ভালো রান্না হচ্ছে।
৩. দেখলাম যে দোষ করেছে সেই ছেলেটিই বড়ো গলায় (চিৎকার করে) সাফাই গাইছে।
৪. আমাদের গ্রামের কানুবাবু বড়ো লোক (ধনী ব্যক্তি) হলেও ভীষণ কৃপণ।
৫. বিদ্যাসাগর, রামমোহন, হাজী মহসিন, মাদার টেরিজার মতো বড়ো মানুষরাই (মহাপুরুষ) আমাদের আদর্শ।
৬. হেড আপিসের বড়োবাবু (প্রধান ব্যক্তি) মানুষ হিসেবে খুব মিশুকে এবং মজাদার।
৭. সরলার মা চোখের জল মুছে মিজানুর-কে আশীর্বাদ করে বললেন ‘বড়ো হও’ (খ্যাতিমান)।
৮. কলেজে গিয়ে ছেলেটি বন্ধুবান্ধবের সঙ্গে মিশে বড়ো মানুষী (ধনী লোকের আদব-কায়দা) চাল শিখেছে।
৯. এত বড়ো বাড়িতে (আকার) জাভেদ আর তার বাবা-মা মাত্র এই তিনজন বাস করে।
১০. উনি বড়ো মুখ করে (প্রত্যাশা) কথাটা বলেছেন তাই আর উপেক্ষা করতে পারলাম না।

ছোটো

১. অসহায়, দরিদ্র মুখ স্বদেশবাসীকে ছোটো নজরে (ঘৃণা) দেখো না।
২. গ্রামের ছোটো (আকার) কুটিরগুলি গাছের সবুজ পাতার মনোরম ছায়ায় ঢাকা।
৩. ছোটো (বয়স) থেকেই নরেন্দ্রনাথ ছিলেন নিষ্ঠীক, সত্যবাদী এবং পরের দুঃখে কাতর।
৪. এত লেখাপড়া শিখেও তুমি যে এমন ছোটো লোকের (অভদ্র) মতো আচরণ করবে তা বুঝতে পারিনি।

৫. জমিজমা সংক্রান্ত এই সামান্য বিষয়ের মীমাংসা ছোটো আদালতেই (নিম্ন আদালত) হয়ে যাবে।
৬. তোমার মিথ্যা কথার জন্য আজ আমি সবার কাছে ছোটো (সম্মান নষ্ট হওয়া) হয়ে গেলাম।
৭. সারাদিনের হাড়ভাঙা খাটুনির ফলে মেজকাকার মুখটা শুকিয়ে ছোটো (সংকুচিত) হয়ে গেছে।
৮. ছোটো ছোটো (সামান্য) কাজের মধ্যে দিয়েও দেশের মঙ্গল করা সম্ভব।
৯. শারীরিকভাবে দুর্বল বলে ওকে ছোটো (হেয়) কোরো না, ওর মনের জোর প্রবল।

ক্রিয়া :

কাটা

১. সামান্য বিষয় নিয়ে দুই বন্ধুতে কথা কাটাকাটি (তর্ক বিতর্ক) করা ঠিক নয়।
২. যেকোনো বিষয়ে আলোচনা হলেই শ্যামল ফোড়ন কাটতে (মতামত দান) শুরু করে।
৩. আমাদের গ্রামে পানীয় জলের অভাব মেটানোর জন্য জমিদারবাবুরা নতুন পুকুর কাটিয়েছেন (খনন করা)।
৪. মাটির উঠানে বসে সতু আর নরু আপন মনে খাতায় আঁক কাটছে (অঙ্কন করা)।
৫. যাত্রার দলে থাকাকালীন তারাপদ নতুন কায়দায় টেরি কাটতে (চুল বিন্যাস করা) শিখেছে।
৬. একলা থাকার অভ্যাস হয়ে গেলেই দেখবে ওসব ভূতের ভয়-টয় কেটে যাবে (সাহস হওয়া)
৭. ভজহরিবাবুর মেয়ের বিয়েতে প্রচুর মিষ্টান্ন লাগবে তাই ময়রা দ্বিগুণ পরিমাণে ছানা কেটেছে (প্রস্তুত করা)।
৮. বন্যা দুর্গতদের সাহায্য করার জন্য পিটার ও রবিন একটি মোটা অঙ্কের চেক কেটে (লিখে দেওয়া) দিয়েছে।
৯. তাত্ক্ষণিক বক্তৃতায় অষ্টম শ্রেণির ওয়াহিদার বক্তব্যের শুরুটা ভালো হলেও শেষে তাল কেটে (সমতা নষ্ট হওয়া) কেটে গেল।

বসা

১. আগামীকাল গ্রাম সংসদের মিটিং বসবে (অনুষ্ঠিত হওয়া)।
২. দইটা এখনও বসেনি (জমে যাওয়া)।
৩. এভাবে বসে (নিষ্কর্মা হওয়া) থাকলেই দিন চলবে?
৪. তালায় চাবিটা বসছে (মাপসই হয়ে লাগা) না।
৫. দুধের শিশুটি দোলনায় বসে (অধিষ্ঠান করা) দোল খাচ্ছে।



১. নীচে প্রদত্ত শব্দগুলি ভিন্ন ভিন্ন অর্থ দেখিয়ে পৃথক বাক্যে ব্যবহার করো :
নাক, কান, সাদা, কালো, লাগা, বাঁধা।
২. কথা, সোজা, কঠিন শব্দগুলি ৫টি ভিন্ন ভিন্ন অর্থে ব্যবহার দেখিয়ে পাঁচটি করে বাক্য রচনা করো।

৩. নীচের ছকটি পূরণ করো :

শব্দ	যে অর্থে ব্যবহার করতে হবে	বাক্য
অঙ্ক	নাটকের পরিচ্ছেদ সংখ্যাঙ্কপক চিহ্ন	
অর্থ	তাৎপর্য প্রয়োজন	
কথা	বিষয় প্রতিশ্রুতি	
কাজ	লাভ পরিশ্রম	
জল	খাবার বিপদ	
মন	উদার বিষণ্ণ হওয়া	
খোলা	মুক্ত সরল	
সাদা	সরল অলিখিত	
রাখা	স্থাপন করা বাঁচানো	

তৃতীয় অধ্যায় পত্রলিখন



পত্র-নমুনা—১

বিষয় : বরেণ্য লেখকের বসতবাটি সংরক্ষণ

সম্পাদক সমীপে
দৈনিক ভোরের বার্তা,
৩, বঙ্কিম চ্যাটার্জি স্ট্রিট,
কলকাতা : ৭০০০৭৩

১২/০১/২০১৫

সবিনয় নিবেদন,

বাংলা সাহিত্যের প্রখ্যাত লেখক সতীনাথ ভাদুড়ীর আবাসগৃহটি বিহারের পূর্ণিয়া জেলায় অনাদরে, অবহেলায় ভগ্নদশাপ্রাপ্ত। সতীনাথ ভাদুড়ী বাংলা সাহিত্যের এক অবিস্মরণীয় নক্ষত্র হিসেবে স্বীকৃত। তাঁর ‘জাগরী’ এবং ‘টোড়াই চরিতমানস’ উপন্যাস অত্যুজ্জ্বল কথাসাহিত্যরূপে মর্যাদা পেয়েছে। বহু পুরস্কারে সম্মানিত এই বিরল-ব্যক্তিত্বের অধিকারী লেখক বাংলাভাষা ও সাহিত্যের গর্ব। তাঁর বসতবাটির এহেন দুরবস্থা দেখে অত্যন্ত বেদনা অনুভব করেছি। আপনার বহুল প্রচারিত সংবাদপত্রের মাধ্যমে আমি কেন্দ্রীয় সরকারের সংশ্লিষ্ট দপ্তর এবং আধিকারিকবৃন্দের দৃষ্টি আকর্ষণ করতে চাইছি। অবিলম্বে ঐ আবাসগৃহটি সরকারি উদ্যোগে মেরামত করে সংরক্ষণের ব্যবস্থা করা উচিত। বাড়ির ফটকে একটি প্রাসঙ্গিক ফলকস্থাপনও প্রয়োজন। সতীনাথ ভাদুড়ীর মতো মহান সাহিত্যিকের স্মৃতিবিজড়িত বসতবাটিকে ঐতিহ্যশালী-ভবন হিসেবে ঘোষণা করাও অত্যন্ত জরুরি।

আশা করি, আমার এই পত্রটি প্রকাশ করে বাধিত করবেন।

১৯, সূর্য দত্ত লেন
কলকাতা : ৭০০০০৬

নমস্কারান্তে
রাকা হালদার

পত্র-নমুনা—২

বিষয় : জীর্ণ সেতু সংস্কার

সম্পাদক সমীপেষু

সমাচার সারাদিন,

২১, আচার্য প্রফুল্লচন্দ্র রোড,

কলকাতা : ৭০০০০৯

১৫/০২/২০১৫

সবিনয় নিবেদন,

দক্ষিণ দিনাজপুরের বালুরঘাট শহর সংলগ্ন আত্রৈয়ী নদীতে ১৯৭১ সাল নাগাদ একটি সেতু নির্মিত হয়েছিল। তারপর বহুদিন এই গৌণ সেতুটির কোনো প্রকৃত রক্ষণাবেক্ষণ হয়নি। বর্তমানে এই সেতুটির জরাজীর্ণ অবস্থা। এই সেতু দিয়ে গ্রাম-গ্রামান্তরে বেশ কিছু প্রয়োজনীয় সামগ্রী-বোঝাই গাড়ি যাতায়াত করে। কয়েকটি স্কুল এবং কলেজের ছাত্র-ছাত্রীরাও এই সেতু নিয়মিত ব্যবহার করে। সেতুটির অবস্থা এতই বিপজ্জনক যে যেকোনো দিন দুর্ঘটনা ঘটতে পারে। একারণে সংশ্লিষ্ট ব্যক্তিবর্গকে আপনার বহুল প্রচারিত সংবাদপত্রের মাধ্যমে আমি বিষয়টি সম্পর্কে অবহিত করতে চাইছি। তাঁরা যদি অনুগ্রহ করে এবিষয়ে সত্বর পদক্ষেপ গ্রহণ করেন, তাহলে ভালো হয়। সেতুটির সংস্কার করা অবিলম্বে প্রয়োজন।

আশা করি, এই বিষয়টির গুরুত্ব বিবেচনা করে আমার পত্র প্রকাশ করে বাধিত করবেন।

সুভাষপল্লি

বালুরঘাট, দক্ষিণ দিনাজপুর

নমস্কারান্তে

বিনয়কুমার বারিক

পত্র-নমুনা—৩

বিষয় : জলাভূমি সংরক্ষণে পদক্ষেপগ্রহণ

সম্পাদক সমীপেষু

দৈনিক সুপ্রভাত,

৪৫, তপসিয়া রোড,

কলকাতা : ৭০০০৪৬

৮/১১/২০১৪

সবিনয় নিবেদন,

বীরভূমের দক্ষিণপাড়া সংলগ্ন পোদ্দারবাগান অঞ্চলে বিস্তীর্ণ জলাভূমি রয়েছে। সম্প্রতি ঐ জলাভূমির পশ্চিমাংশে জনৈক অসাধু প্রোমোটর ‘কৃষ্ণ-টাওয়ার’ নামে একটি বহুতল আবাসন বানানোর কাজে ঐ জলাভূমি বুজিয়ে নির্মাণকার্য চালাচ্ছেন। আপনার বহুল প্রচারিত সংবাদপত্রের

মাধ্যমে এই ভয়ংকর ঘটনাটি আমি সংশ্লিষ্ট পৌরসভার নজরে আনতে চাইছি। গোপনে এই ধরনের সবুজ ধ্বংসের প্রক্রিয়া সমস্ত অঞ্চলের বাস্তুতন্ত্রকে বিপন্ন করবে। এ ধরনের যেকোনো কাজই দেশের আইনবিরুদ্ধ। যত দ্রুত এই ঘটনার বিরুদ্ধে পদক্ষেপ গ্রহণ করা যায়, ততই মঙ্গল। অবিলম্বে জলাভূমি বুজিয়ে নির্মাণকাজ স্থগিত করা হোক এবং দোষী প্রমোটারকে গ্রেপ্তার করা হোক।

আশা করি, ঘটনাটির গুরুত্ব বিবেচনা করে আপনি আমার পত্রটি প্রকাশ করে বাধিত করবেন।

সিউডি
বীরভূম, পিন : ৭৩১১০১

নমস্কারান্তে
শেখ আবিদ আলি



১. তোমার এলাকার ঐতিহ্যবাহী পুরনো গ্রন্থাগারটির উপযুক্ত রক্ষণাবেক্ষণের অভাব রয়েছে। এবিষয়ে সংশ্লিষ্ট কর্তৃপক্ষের দৃষ্টি আকর্ষণ করার লক্ষ্যে সংবাদপত্র সম্পাদকের কাছে একটি পত্র লেখো।
২. হাসপাতালের সামনে জোরে মাইক বাজানো অমার্জনীয় অপরাধ। এই মর্মে সচেতনতা গড়ে তুলতে সংবাদপত্রে চিঠি লেখো।
৩. বন্যার প্রকোপে গ্রামের বহু কৃষিজমি নদীর গ্রাসে হারিয়ে যাচ্ছে— নদীর পাড়গুলির স্থায়ী রক্ষণাবেক্ষণ প্রয়োজন। এবিষয়ে সংবাদপত্রের সম্পাদকের কাছে একটি চিঠি লেখো।
৪. তোমার অঞ্চলে যত্রতত্র আবর্জনার স্তুপ। সংশ্লিষ্ট কর্তৃপক্ষের দৃষ্টি আকর্ষণ করে একটি বহুল প্রচারিত সংবাদপত্রের সম্পাদককে চিঠি পাঠাও।
৫. গ্রামীণ বিদ্যালয়গুলিতে কম্পিউটার শিক্ষাকেন্দ্র গড়ে তোলার আশু প্রয়োজনীয়তার কথা জানিয়ে বহুল প্রচারিত দৈনিকে একটি চিঠি প্রেরণ করো।

চতুর্থ অধ্যায়

প্রবন্ধ রচনা



রচনা—১

কন্যাশ্রী : নারীকল্যাণে অগ্রণী ভূমিকায় পশ্চিমবঙ্গ

‘কন্যাশ্রী’ শুধু একটি প্রকল্পের নাম নয়। ‘কন্যাশ্রী’ এক অপৰূপ স্বপ্নের বাস্তবায়ন। জাতীয় এবং আন্তর্জাতিক ক্ষেত্রে উচ্চপ্রশংসিত এই প্রকল্প। এমনকি উন্নত, অগ্রসর দেশগুলিও এই প্রকল্পকে অনুকরণযোগ্য হিসেবে গ্রহণ করেছে। এই প্রকল্পের কেন্দ্রে রয়েছে বাংলার কন্যার তৈরি, বঙ্গসমাজের মেয়ের দল। অবহেলা, বঞ্চিত যুগান্তে এই প্রকল্প ঘোষণা করলো তাদের সামাজিক সুরক্ষার সমুজ্জ্বল ভবিষ্যতের। দিকে দিকে ছড়িয়ে গেল এক নতুন আলোর ইশারা। নানাস্তরে, নানান কাঠামোয় সমাজে কন্যার ভূমিকা, কন্যার সাফল্যকে নিশ্চিত করতে সরকারি এই প্রকল্প আবির্ভূত হলো। নতুন সময়ের, নতুন সমাজের এ এক অনন্য অঙ্গীকার, এক অনবদ্য সংকল্প।



আমাদের রাজ্যে ১৩ থেকে ১৮ বছর এবং ১৮ থেকে ১৯ বছর বয়সি ছাত্রীদের জন্য এক অভূতপূর্ব প্রকল্প হিসেবে পশ্চিমবঙ্গ সরকার চালু করেছে কন্যাশ্রী প্রকল্প। পশ্চিমবঙ্গে প্রায় ১ কোটি ৭৩ হাজার মানুষ আছে যাদের বয়স ১০ বছর থেকে ১৯ বছরের মধ্যে। এর মধ্যে ৪৮.১১ শতাংশই মহিলা। আমাদের রাজ্যে মহিলাদের মধ্যে বাল্যবিবাহের প্রবণতা অধিক, বিশেষত গ্রামীণ অংশে এই বাল্যবিবাহের হার আরো বেশি। এই মহিলাদের জীবনের পথে স্বয়ংসম্পূর্ণভাবে এগিয়ে

যাওয়ার জন্য মাননীয় মুখ্যমন্ত্রী তাঁর স্বপ্নের প্রকল্পটি ঘোষণা করেছেন। বিদ্যালয়-ছুট, বাল্যবিবাহ, অল্পবয়সে মাতৃত্ব এবং পারিবারিক হিংসার হাত থেকে মেয়েদের বাঁচাতে সব চাইতে উপযোগী হলো বিদ্যালয়ে অধিক সময়ে থাকা। এর ফলে পড়াশুনোর মাধ্যমে যেমন গড়ে উঠবে সচেতনতা, আত্মবিশ্বাস, তেমনি এড়ানো যাবে বাল্যবিবাহ বা পারিবারিক হিংসাকেও।

কন্যাশ্রী প্রকল্পের দুটি অংশ — (১) বার্ষিক অনুদান হিসেবে ৫০০ টাকা এবং (২) এককালীন হিসেবে ২৫০০০ টাকা। প্রথম অংশটি পাবে ১৩ থেকে ১৮ বছর বয়সের অবিবাহিত ছাত্রীরা এবং যাদের বয়স ১৮ বছর হয়ে গেছে, তারা পাবে দ্বিতীয় অংশটি। বার্ষিক অনুদানটি এ বছরে বেড়ে হয়েছে ৭৫০ টাকা। যেসব ছাত্রীর পারিবারিক আয় বছরে ১ লক্ষ ২০ হাজার টাকার নীচে কিংবা বাবা-মা দুজনেই মারা গেছেন বা ৪০ শতাংশ শারীরিক প্রতিবন্ধী তারা এই প্রকল্পের আওতায় আসবে। এই প্রকল্প জোর দিয়েছে অবিবাহিত থাকা এবং বিদ্যালয়ে নিয়মিত উপস্থিত থাকার উপর। পশ্চিমবঙ্গ সরকার এক বছরে ১৮ লক্ষ ছাত্রীকে বার্ষিক ভাতা এবং ৩.৫ লক্ষ ছাত্রীকে এককালীন অনুদান দেওয়ার কথা বলেছে।

কন্যাশ্রী প্রকল্প আরম্ভ হওয়ার পর আমাদের সমাজের মেয়েদের মধ্যে যে যে বিষয়ে উল্লেখযোগ্য পরিবর্তন ইতিমধ্যেই চোখে পড়েছে তা হলো :

- মেয়েদের বাল্য বিবাহে অনীহা। বহুক্ষেত্রে এই ধরনের বিবাহে মেয়েরাই প্রতিবাদ জানাতে শুরু করেছে। তারা আইনের সাহায্যও নিচ্ছে।
- বিদ্যালয়ের মাধ্যমিক ও উচ্চমাধ্যমিক স্তরে টাকা পয়সার অভাবে মেয়েদের পড়াশুনো যে বন্ধ হয়ে যেত, তা অনেকখানি প্রতিরোধ করা গেছে। মাধ্যমিক পাশের পর তারা এগিয়ে চলেছে উচ্চ-মাধ্যমিক স্তরের দিকে।
- আমাদের রাজ্যের গরীব মেয়েদের অপুষ্টি ও অপুষ্টিজনিত ব্যাধির ক্ষেত্রেও কন্যাশ্রী প্রকল্প উন্নতির দিশা দেখাচ্ছে।
- দারিদ্র্যের কারণে নারীপাচার যে সামাজিক ব্যাধির মতো আমাদের রাজ্যে ছেয়ে গিয়েছিল, কন্যাশ্রী প্রকল্প সেখানেও পালন করেছে ইতিবাচক ভূমিকা।

মাত্র দু-বছরের মধ্যেই এই কন্যাশ্রী প্রকল্প স্বপ্ন জাগিয়েছে পশ্চিমবাংলার মেয়েদের চোখে। তারা আজ প্রতিজ্ঞাবদ্ধ তাদের জীবনকে সুন্দর করে সাজিয়ে তোলার লক্ষ্যে। রবীন্দ্রনাথ ঠাকুর তাঁর কবিতায় নারীকে আপনভাগ্য জয় করার যে কথা বলেছিলেন, আজ তা প্রতিষ্ঠিত হওয়ার পথে। আজকের নারী তাই বলতে পারেন : ‘আমি প্রগতি/আমি কন্যাশ্রী, আমি সাহস/আমি কন্যাশ্রী, আমি প্রতিজ্ঞা/আমি কন্যাশ্রী। ২৭ লক্ষ কন্যা আজ এগিয়ে চলেছে কন্যাশ্রীর পথে। এসো, যোগ দাও তুমিও।’

খেলাধুলোর প্রয়োজনীয়তা

বহু প্রাচীন প্রবাদেই বলা আছে খেলাধুলোর প্রয়োজনীয়তার কথা : ‘সুস্থ দেহেই সুস্থ মনের বাস।’ একজন মানুষের সর্বাঙ্গীণ বিকাশের অর্থ দেহ-মন-আত্মার পরিপূর্ণ বিকাশ। কোনোযন্ত্রযদি নিথর হয়ে পড়ে থাকে তা জং পড়ে নষ্ট হয়ে যায়। মানুষের শরীরও এক ধরনের যন্ত্র, অব্যবহারে রোগ বাসা বাঁধে, চিন্তা করার ক্ষমতা লোপ পায়। তাই দৈহিক চর্চা প্রয়োজন। সেই দৈহিক চর্চার ক্ষেত্রে প্রয়োজন খেলাধুলো।

খেলাধুলোর ব্যাপক প্রসার শরীরচর্চার বিকাশ সেক্ষেত্রে সমাজে নবপ্রাণের জোয়ার আনতে পারে। অগণিত মূঢ় স্তান মূক মুখে জীবনের আনন্দমুখর ভাষা ফুটিয়ে তুলতে পারে, “All work and no play makes jack a dulldeoy” কথাটি এ প্রসঙ্গে স্মরণযোগ্য।

ছাত্রজীবনে খেলাধুলোর গুরুত্ব অসীম। পুস্তক পাঠ্য ও শরীরচর্চা এ দুয়ের সমবায়েই শিক্ষার্থীর দেহ-মন-আত্মার বিকাশসাধন হতে পারে। গ্রন্থকীট শিক্ষার্থী বা জ্ঞানার্থী কেবলমাত্র জ্ঞানচর্চায় নিমগ্ন থেকে যদি শরীর ও স্বাস্থ্যের দিকটিকে উপেক্ষা করে, তবে তার জ্ঞানচর্চা ভগ্ন স্বাস্থ্যের কারণে বিঘ্নিত হতে পারে। দ্বিতীয়তঃ অবকাশের অযোগ্য ব্যবহারে জীবনে আসে ক্লান্তি, বৈচিত্র্যহীনতা ও একঘেয়েমি। পুস্তক পাঠ, জ্ঞানচর্চা ও উচ্চচিন্তনের পাশাপাশি অবসরকে আলস্যের নিক্রিয়তায় ভরিয়ে না তুলে কিংবা শ্রান্তপথে চালিত না করে বিভিন্ন অন্তর্বিভাগীয় বা বহির্বিভাগীয় খেলাধুলোর মধ্যে সদ্যবহার করাই সুফলদায়ক।

সমস্ত খেলাধুলোই কঠোর নিয়মকেন্দ্রিক। সুতরাং খেলাধুলোয় অংশগ্রহণ করলেই বিশেষ বিশেষ খেলার নিয়ম নীতিগুলো ব্যক্তিকে মেনে চলতে হয়। খেলাধুলোয় দক্ষতা অর্জনের অনুশীলন, নিয়মগুলিকে আয়ত্ত করা, বিপক্ষকে অতিক্রম করার মানসিকতা থেকে ব্যক্তি-চবিত্রের মধ্যে অতিরিক্ত কিছু গুণ সংযোজিত হয়। যেগুলি তার সংঘাতময় জীবনের ক্ষেত্রে বিশেষ প্রয়োজনে লেগে যায়। খেলাধুলো মানুষকে নিয়মানুবর্তিতা ও সময়ানুবর্তিতার শিক্ষা দেয়। খেলাধুলোর অন্তর্গত নিয়মগুলি মেনে চলতে যে কোনো খেলোয়াড় বাধ্য থাকে। আবার খেলাধুলোয় সঠিক সময়সীমা বা সময়ানুবর্তিতার একটা বিশেষ গুরুত্ব আছে। সময়ের অসদ্যবহারে বা বৃথা কালক্ষেপে খেলাধুলোর মূল ধর্মটিই বিনষ্ট হয়ে পড়ে। বস্তুতঃ জীবনের সর্বক্ষেত্রেই নিয়মানুবর্তিতার সঙ্গে সময়ানুবর্তিতার একটা নিগূঢ় ভূমিকা রয়েছে।

একতা, সংঘবদ্ধতা ও সমষ্টির প্রতি আনুগত্য বোধের শিক্ষা খেলাধুলো থেকে পাওয়া যায়। দলবদ্ধভাবে যেসব খেলা সম্পন্ন হয় সেখানে পারস্পরিক সহযোগিতা ক্রীড়ার সাফল্য আনয়নের প্রধান শর্ত। একটি দল যখন প্রত্যেকটি খেলোয়াড়ের সম্মিলিত প্রয়াসে, একতালে-একসূরে পরিচালিত হয় তখন দলীয় শক্তির সার্বিক বিকাশ ঘটে এবং ক্রীড়ায় সাফল্য আসে। পারস্পরিক আপস বা বোঝাপড়া এবং ব্যক্তি স্বার্থের পরিপূষ্টির স্থল সমাজ স্বার্থকে বড়ো করে দেখার প্রবণতা খেলাধুলো থেকে মানুষ সহজেই গ্রহণ করতে পারে।

খেলাধুলো মানুষের আত্মবিশ্বাসকে বাড়িয়ে তোলে, সংগ্রামস্পৃহাজাগিয়ে তোলে এবং জীবনে সাফল্য ও ব্যর্থতাকে মানানসই করে গ্রহণ করতে সাহায্য করে। সাফল্যে খেলোয়াড় যেমন উল্লসিত হয়ে ওঠে, তেমনি ব্যর্থতাকেও একটি অনিবার্য, প্রত্যাশিত এবং সম্ভাব্য ফল হিসেবে গ্রহণ করার মানসিকতা অর্জন করে। এছাড়াও খেলাধুলো মানুষের নৈতিক চরিত্রের উন্নয়ন ঘটানোর সহায়ক, খেলাধুলোয় সততা ও নিষ্ঠা অবশ্য প্রয়োজনীয়। নীতি ও সততার বিসর্জনে খেলাধুলোর আকর্ষণটাই সম্পূর্ণরূপে নষ্ট হয়ে যায়।

পৃথিবীব্যাপী খেলাধুলোর আজ ব্যাপক প্রচলন লক্ষিত হয়। আন্তর্জাতিক প্রতিযোগিতার সাফল্য একটি দেশের সম্মান বৃদ্ধিতে যথেষ্ট সহায়তা করে। অপরদিকে ব্যক্তিগত দক্ষতার যথেষ্ট মূল্য ও সম্মান দেওয়া হয়ে থাকে। ক্রীড়াক্ষেত্রে সেই অর্থজীবন রঞ্জাভূমির একটি ক্ষুদ্র সংস্করণ। উত্থান ও পতনের দ্বৈত ভূমিকায় সর্বদা উৎকর্ষা, উত্তেজনা ও তীব্র মানসিক অস্থিরতার টানটান অনুভূতি।

রচনা—৩

ছাত্রসমাজ : আদর্শ ও কর্তব্য

একটি বাড়ি যেমন তার মজবুত ভিতের উপর দাঁড়িয়ে থাকে, তেমনি মানুষের জীবনও গড়ে ওঠে ছাত্রজীবনের উপর ভিত্তি করেই। ছোটো থেকে বড়ো হওয়ার পথে যে আদর্শ ও কর্তব্যের দিকচিহ্নটি ক্রমশ ফুটে উঠে, তা-ই শেষপর্যন্ত জীবনের স্বরূপকে স্পষ্ট করে। এই আদর্শ ও কর্তব্য যদি বিশৃঙ্খল ও নৈরাজ্যকে বরণ করে, তাহলে ভবিষ্যৎ জীবনও হয়ে উঠবে অন্ধকারময় ও হতাশাগ্রস্ত। তাই ব্যক্তি মানুষ হিসেবে, সামাজিক মানুষ হিসেবে, নাগরিক হিসেবে এক সম্পূর্ণ মানুষ হয়ে উঠবার ক্ষেত্রে ছাত্রজীবনের অভ্যাসই সমিধ জোগায়।

প্রাচীন ভারতে ছাত্রজীবন ছিল কঠোর অভ্যাস ও পরিশ্রমের সময়। সে-সময় ছাত্রদের গুরুগৃহে বাস করতে হতো। সেখানে শুধু পড়াশুনোই হত না, অধ্যয়নের বাইরে সংযম ও শৃঙ্খলাবোধের

অভ্যাস করতে হতো। ক্রমে ছাত্রজীবনের প্রধান ও একমাত্র কর্তব্য হয়ে দাঁড়ায় পড়াশুনো, ছাত্রনাং অধ্যয়ন তপঃ — অধ্যয়নই ছাত্রদের একমাত্র তপস্যা। এর ফলে তৈরি হতে লাগল কিছু গ্রন্থকীট। বইয়ের বাইরের দুনিয়ার সঙ্গে এদের কোনো যোগ রইল না। সমাজও এই গ্রন্থকীটদের এক আলাদা বৃত্তের মধ্যে রাখতে চাইল। সামাজিক সমস্যায়, মানুষের বিপদে আপদে, প্রাকৃতিক দুর্যোগে বা মহামারীর মতো ঘটনায় আক্রান্ত মানুষের পাশে দাঁড়াল যারা, তাদের সঙ্গে গ্রন্থকীটদের সৃষ্টি হলো দূরত্ব। পড়াশুনোয় ভালো মানে ভালো ছেলে আর খারাপ মানেই খারাপ ছেলে, এমন ভাবে ভাগ হয়ে গেল ছাত্রসমাজ।

আসলে এখানে শিক্ষার মূল লক্ষ্য সম্বন্ধেই আমরা ভুল ভেবেছি। শিক্ষা মানে পরীক্ষায় পাশ করা নয়, শিক্ষা মানে ছাত্রছাত্রীদের দেহ-মন-চেতনার সার্বিক বিকাশ ঘটানো, সমাজসত্তা ও বিবেকবোধকে জাগ্রত করা। অন্যের জন্য নিজেকে উৎসর্গ করার মধ্যেই রয়েছে ছাত্রজীবনের আদর্শ ও কর্তব্য। এই আদর্শ ও কর্তব্য গড়ে তোলার জন্য দেশের সরকারও শিক্ষা নিয়ে বিভিন্ন পরিকল্পনা করে থাকে। কারণ সামান্য পরিকল্পনার অভাব, সতর্কতার অভাব, একটু অবহেলা গোটা জীবনটা নষ্ট করে দিতে পারে।

আমাদের দেশ নানা সমস্যায় জর্জরিত। নিরক্ষরতা, সাম্প্রদায়িক সম্প্রীতির অভাব, দারিদ্র, কুসংস্কারাচ্ছন্নতাইত্যাদি আমাদের নিত্য সঙ্গী। পড়াশুনোর পাশাপাশি ছাত্রসমাজই পারে এই সব সমস্যার মোকবিলা করতে। নিরক্ষরতা জাতির জীবনে অভিশাপ। সেখানে শিক্ষার আলো ফেলতে পারে ছাত্রসমাজ। বিজ্ঞান ও যুক্তির প্রয়োগ করে ধর্মীয় সংকীর্ণতার উপরে উঠে কুসংস্কারকে দূরে সরিয়ে ভ্রাতৃত্বের মহান আদর্শকে দেশবাসীর সামনে তুলে ধরতে পারে ছাত্রছাত্রীরা। বছরের মধ্যে দীর্ঘ অবকাশগুলিতে সেবামূলক কাজে নিয়োজিত করতে পারে, এগিয়ে যেতে পারে অবহেলিত মানুষদের সাহায্য করতে।

কিন্তু এই সময়ে এক বিভ্রান্তি যেন গ্রাস করছে ছাত্রছাত্রীদের। পরীক্ষার হলে নৈরাজ্য, শিক্ষক শিক্ষিকাদের প্রতি কদর্য আচরণ, ছাত্ররাজনীতির নামে গুন্ডামি যেন প্রাধান্য পাচ্ছে। কিন্তু এই বিভ্রান্তি ও আদর্শহীনতা দীর্ঘস্থায়ী হতে পারে না। সমাজের শুবুন্দি সম্পন্ন মানুষ এর প্রতিবাদ করেন। ছাত্রছাত্রীরাও নিজের ভুল বুঝতে পারেন। আশা করা যায় রাষ্ট্রব্যবস্থা এই অবস্থার কথা চিন্তা করে নতুন ভাবে পরিকল্পনা করবে। বিদ্যালয় থেকে বিশ্ববিদ্যালয় সর্বত্র পড়াশুনো ও সমাজমনস্কতার চর্চা হবে। ছাত্রসমাজের হাত ধরেই ঘটবে দেশের সর্বাঙ্গীন উন্নতি।

বিজ্ঞানমনস্কতা ও কুসংস্কার

সংস্কার বলতে বহু যুগ ধরে চলে আসা প্রচলিত ধ্যানধারণা ও অন্ধবিশ্বাসকে বোঝায়। অন্যদিকে বিজ্ঞানমনস্কতার জন্ম মানুষের যুক্তিবোধ ও বিশ্লেষণাত্মক দৃষ্টিভঙ্গি থেকে। মানবমন অনুসন্ধিৎসু এবং কৌতূহলী। সে চায় জাগতিক ঘটনা ও প্রাকৃতিক বিষয়ের বিভিন্ন সম্পর্কের মধ্যে নিহিত সত্যকে উদ্ঘাটিত করতে। তাই স্বাভাবিকভাবেই সংস্কারগ্রস্ত মনের সঙ্গে সত্যান্বেষী মানবমনের নিত্য-বিরোধ। কারণ সংস্কারাচ্ছন্ন অন্ধত্বের বশবর্তী হয়ে মানুষ, জাগতিক সমস্ত কিছুর সঙ্গে মেনে ও মানিয়ে চলতে অভ্যস্ত। অথচ বৈজ্ঞানিক অনুসন্ধিৎসা চিরকাল আপসহীন, এবং যে-কোনো মূল্যে সত্য উদ্ঘাটনে তৎপর।

আদিমযুগে আগুনের আবিষ্কারের সঙ্গে সঙ্গেই হয়তো মানবমনের জ্ঞানান্বেষণের আগুনও উদ্দীপিত হয়েছিল। বৈজ্ঞানিক যুক্তির পথে তখন থেকেই আদিম পৃথিবীর বুকে মানুষের পথ হাঁটা শুরু। সভ্যতার ইতিহাসে মনন-নির্ভর শাণিত যুক্তির সঙ্গে প্রচলিত সংস্কারের এই দ্বন্দ্ব সে-সময় থেকেই প্রবহমান ছিল। তবে প্রামাণ্য ইতিহাসের নিরিখে মধ্যযুগের ধর্মবিশ্বাসের অন্ধকারাচ্ছন্ন বলয়ে দাঁড়িয়ে সম্ভবত গ্যালিলিওই প্রথম যুক্তি ও বিজ্ঞানচর্চার দিকে মানুষকে পথ হাঁটতে শিখিয়েছিলেন। এক্ষেত্রে গ্যালিলিওর আগে ও পরে কোপারনিকাস, কেপলার, নিউটন, রজার বেকন প্রমুখ মনীষীদের হাত ধরে সারা বিশ্বে বৈজ্ঞানিক যুক্তিবোধের নবজাগরণ ঘটে। মধ্যযুগের এই শেষলগ্নকেই আমরা ‘Age of Reasons’ ও ‘Age of Enlightenment’ বলে অভিহিত করি। তখন থেকেই ক্রমে সারা পৃথিবীতে ধর্মীয় সংস্কার ও সাবেকি ধ্যানধারণার অনুকরণ থেকে মুক্ত হয়ে মানুষ ক্রমশ সত্য ও যুক্তির পথকে গ্রহণ করতে শেখে। যে-কোনো জাগতিক ঘটনাকেই যে যুক্তির কষ্টিপাথরে যাচাই করে নিতে হয় এবং বৈজ্ঞানিকভাবে প্রমাণসিদ্ধ না হলে তা যে বিশ্বাস করা যায় না—ক্রমশ এই ধারণা মানুষের মনে দৃঢ় হতে থাকে।

আজ একবিংশ শতকের সূচনালগ্নে দাঁড়িয়ে আমরা দেখি বিজ্ঞানমনস্কতা মানবমনের সাবেকি অন্ধবিশ্বাসকে কোণঠাসা করেছে একথা সত্য। কিন্তু মানবমনে জন্মে থাকা অন্ধবিশ্বাসকে সম্পূর্ণ নির্মূল করতে পারেনি। তাই আজও যখন শিক্ষক-অধ্যাপক-চিকিৎসক এমনকী বৈজ্ঞানিককেও আমরা দেখি মাদুলি, তাবিজ কিংবা গ্রহরত্ন ধারণ করতে তখন আমরা বুঝতে পারি বিজ্ঞান তাঁর

পেশা বা বৃত্তিমাত্র। কিন্তু তিনি প্রকৃত অর্থে একজন বিজ্ঞানমনস্ক মানুষ নন। অর্থাৎ বিজ্ঞানমনস্কতা প্রকৃতপক্ষে মানবমনের এমন এক সচেতনতা ও যুক্তিবোধ, যা মানুষের বৈজ্ঞানিক মনন ও চিন্তাচর্চার উপর নির্ভরশীল। সুতরাং হাঁচলে দাঁড়ানো, বিড়াল ডিঙোলে রাস্তায় আটকে পড়া প্রভৃতি নানান অর্থহীন অস্থবিশ্বাসের শেকল ভাঙতে হলে বিজ্ঞানবুদ্ধির চর্চায় জোর দিতে হবে। তাই বৈজ্ঞানিক মননের এই শিক্ষার আরম্ভ হওয়া উচিত অল্পবয়স থেকেই। কারণ সমস্ত অস্থবিশ্বাসের মূলে আছে মানুষের মনে যুগ যুগ ধরে পুঞ্জীভূত অজ্ঞতা, অজ্ঞানতা ও অসচেতনতা। এই অজ্ঞানতার মোহমুক্তি ঘটিয়ে মানুষকে যুক্তি ও জ্ঞানের তীক্ষ্ণ আলোয় দীক্ষিত করতে পারলেই মানুষের ক্রমমুক্তি ঘটবে। সেইদিন আমাদের ভবিষ্যৎ প্রজন্ম, মনের সমস্ত কুসংস্কার দূরে সরিয়ে হয়ে উঠবে যুক্তিবাদী ও মুক্তমনের অধিকারী এক সার্থক মানুষ।

রচনা—৫

পথনিরাপত্তা ও আমরা

বর্তমান সময়ে বিভিন্ন মহানগরীতে, বিশেষত কলকাতায় পথনিরাপত্তার প্রসঙ্গটি বহু-আলোচিত। যানবাহন এবং নিত্যযাত্রীর সংখ্যার অনুপাতে রাস্তা যেখানে অনেক কম, যেখানে প্রায়শই পথদুর্ঘটনা ঘটতে দেখা যায়। আমাদের রাজ্য পশ্চিমবঙ্গে বহু নতুন রাস্তা, উড়ালপুল, বাইপাস তৈরি হচ্ছে মানুষের যোগাযোগ আর যাতায়াতকে দ্রুত ও সহজ করার লক্ষ্যে। তবু দেখা যায় বহুক্ষেত্রেই জনসংখ্যা এবং যানবাহনের আধিক্য পথনিরাপত্তাকে প্রশ্নচিহ্নের মুখে দাঁড় করিয়ে দেয়।

পথচারীদের অনেকের মধ্যেই যেমন যান-নিয়ন্ত্রণের নিয়ম তথা ব্যবস্থা সম্পর্কে অজ্ঞানতা দেখা যায়, তেমনি বহু চালকের মধ্যেও দক্ষতার অভাব এবং উদ্বাসিতা লক্ষ করা যায়। ফলে বেড়ে চলে পথ দুর্ঘটনার পরিসংখ্যান।

সুষ্ঠু ও নিরাপদ জীবনযাপনের কথা ভেবে পথনিরাপত্তা বিষয়ে প্রয়োজনীয় সচেতনতা গড়ে তুললে বহু দুর্ঘটনা এড়ানো সম্ভব হবে। প্রতিটি বিদ্যালয়ে এ বিষয়ে চর্চার পরিসর গড়ে উঠলে ছাত্রছাত্রীরা অবহিত হবে। ইতোমধ্যেই শহরাঞ্চলে ট্রাফিক পুলিশ বিভাগ এবং বিদ্যালয়ের শিক্ষক শিক্ষিকাদের উদ্যোগে পথনিরাপত্তা বিষয়ে সচেতনতা-শিবির আয়োজিত হয়েছে। পথনিরাপত্তা সপ্তাহে যান-নিয়ন্ত্রণে সামিল হয়েছে বহু বিদ্যালয়ের অগণিত ছাত্রছাত্রী। এভাবেই তারা জানতে পারে এবং



অপরকে জানাতে পারে পথ ব্যবহারের নিয়ম-কানুন। আশা করা যায় নিয়মিত সেগুলি অনুশীলনের মাধ্যমে তাদের সু-অভ্যাস গড়ে উঠবে এবং ভবিষ্যতে সু-নাগরিক হিসেবে নিজেদের দায়িত্বপালনের মধ্যে দিয়ে তারা পথ দুর্ঘটনাকে বহুলাংশে প্রশমিত করতে পারবে।

প্রতিদিন পথে দেখা যায় কত বাস, ট্যাক্সি, জিপ, মোটরসাইকেল, সাইকেল, ভ্যান, রিকশা, মালবাহী লরি, অটো, ম্যাটাডোর প্রভৃতি। অনেক রাস্তায় নির্দিষ্ট লাইনে চলাচল করে ট্রাম। প্রতিনিয়ত বেড়ে চলেছে এদের সংখ্যা এবং গতি। আর সে কারণেই নিরাপদে পথ-চলতে আজকের দিনে বড়ো প্রয়োজন ট্রাফিক সচেতনতার। যেখানে বড়ো রাস্তার পাশে ফুটপাথ আছে, তা ব্যবহার করা উচিত। যেখানে ফুটপাথ নেই সেখানে রাস্তার ডানদিক ধরে হাঁটতে হবে। গাড়ি যেদিক থেকে আসছে সেদিকে পিছন ফিরে হাঁটা অনুচিত। শিশুরা রাস্তায় হাঁটার সময় তাদের হাত ধরে অভিভাবকেরা যেন তাদের নিজেদের বাঁদিকে রাখেন সেদিকে লক্ষ রাখতে হবে। রাস্তায় কখনই অন্যমনস্ক হলে চলবে না। মোবাইল ফোনে কথা বলা, বন্ধুদের সঙ্গে দলবেঁধে চলা, গল্প করতে করতে হাঁটা বন্ধ করতে হবে।

যেসব জায়গায় রাস্তা পার হওয়ার জন্য জেরা ক্রসিং, সাবওয়ে, ফুটব্রিজ, ওভারব্রিজ রয়েছে — সেগুলি ব্যবহার করা উচিত। রাস্তায় চলার সময় ট্রাফিক পুলিশ বা ট্রাফিক সিগন্যাল মেনে চলা প্রয়োজন। সিগন্যাল ব্যবস্থা না থাকলে প্রথমে ডানদিকে, তারপর বাঁ দিকে, তারপর আবার ডানদিক দেখে রাস্তা নিরাপদ মেনে হলে তবেই তা পার হওয়া উচিত। দৃষ্টি কোনোভাবে আড়ালে পড়েছে এমন পরিস্থিতিতে রাস্তা পার হওয়া উচিত নয়। এছাড়াও রাস্তায় খেলা, ছোট্টছুটি করা, ছুটে রাস্তা পেরোনো, বাঁকের মুখে রাস্তা পার হওয়া কিংবা পিছল রাস্তায় অসতর্কভাবে চলা উচিত নয়।

চালকেরা যেমন সতর্কতার সঙ্গে, সিগন্যাল মেনে, নির্দেশিত গতিতে গাড়ি চালাবেন, নির্দিষ্ট স্টপেজে দাঁড়াবেন, তেমনই যাত্রীরাও অযথা চলন্ত বাসের ফুটবোর্ডে দাঁড়াবেন না, চলন্ত গাড়িতে ওঠানামা করবেন না, অযথা হুড়োহুড়ি না করে শৃঙ্খলাবদ্ধ হয়ে চলাফেরা করবেন।

পথে গাড়ি চালানোর আগে চালক সেটি প্রয়োজনমতো যথাযথ পরীক্ষা করে নেবেন। কখনই তাঁরা ট্রাফিক নিয়ম ভাঙবেন না, অযথা হর্ন ব্যবহার করবেন না, গাড়ি চালানোর সময় উত্তেজক পানীয় কিংবা খাবার খাবেন না, বাঁদিক দিয়ে অন্য গাড়িকে ওভারটেক করবেন না —এটাই প্রত্যাশিত। তাঁরা যেন সবসময় সেফটি বেল্ট ব্যবহার করেন। মালবাহী গাড়ির চালকেরা যেন কখনই ক্ষমতার অতিরিক্ত জিনিস বহন না করেন। বাইক আরোহীরা যেন কখনই হেলমেট ছাড়া পথে না বেরোন। প্রয়োজনমতো প্রতিটি গাড়িচালককে হাতের নির্দেশ বা ইন্ডিকেটর লাইট ব্যবহার করতে হবে।

এভাবে আমরা প্রত্যেকে যদি ট্রাফিক-এর নিয়ম মেনে চলি তাহলে আমাদের নিরাপত্তা সুনিশ্চিত হবে, কখনই আমাদের দুর্ঘটনার কবলে পড়তে হবে না।

আমাদের প্রতিজ্ঞা

পথ সংস্কৃতি জানব
ট্রাফিক নিয়ম মানব
আমি সতর্ক হয়ে চলব
সুস্থভাবে এগিয়ে যাব
পথকে জয় করব
শান্ত জীবন গড়ব
পথ শুধু আমার নয়
এ পথ মোদের সবার
তা সর্বদা মনে রাখব



SAFE DRIVE SAVE LIFE

- Safe Drive Save Life হবে আমার জীবনের শপথ।
- Safe Drive Save Life নিরাপদ করে পথ।
- Safe Drive Save Life হোক আমার সুস্থ চেতনা।
- Safe Drive Save Life হোক আমার স্বপ্ন সাধনা।
- Safe Drive Save Life আমার জীবন, আমার বেঁচে থাকা।
- Safe Drive Save Life হোক সবাইকে নিরাপদ রাখা।
- Safe Drive Save Life এগিয়ে চলার গান।
- Safe Drive Save Life নতুন বাঁচার আহ্বান।





- নীচের বিষয়গুলি অবলম্বনে কমবেশি ২৫০ শব্দে প্রবন্ধ রচনা করো :
- ১. প্রাত্যহিক জীবনে বিজ্ঞান
- ২. আধুনিক জীবনে বিজ্ঞান বনাম কুসংস্কার
- ৩. মাতৃভাষায় বিজ্ঞানচর্চা
- ৪. একজন শ্রেষ্ঠ বাঙালি বিজ্ঞানী
- ৫. দেশাত্মবোধ ও জাতীয় সংহতি
- ৬. তোমার দৃষ্টিতে একজন আদর্শ স্বাধীনতা সংগ্রামী
- ৭. ছাত্রজীবনের দায়িত্ব ও কর্তব্য
- ৮. জাতিভেদ ও অস্পৃশ্যতা দূরীকরণে ছাত্রসমাজের ভূমিকা
- ৯. দেশগঠন ও ছাত্রসমাজ
- ১০. বিদ্যালয় জীবনে খেলাধুলার ভূমিকা
- ১১. তোমার প্রিয় খেলা
- ১২. বিশ্বক্রীড়াঙ্গনে ভারত
- ১৩. কোপা আমেরিকা ২০১৫
- ১৪. রিও অলিম্পিক্স ২০১৬